

**SEVENTH LEGISLATIVE ASSEMBLY OF MIZORAM  
( FOURTH SESSION )**

**LIST OF BUSINESS**

FOR FOURTH SITTING ON FRIDAY, THE 14<sup>th</sup> NOVEMBER, 2014  
( Time 10:30 A.M. to 1:00 P.M. and 2:00 P.M. to 4:00 P.M. )

**QUESTIONS**

1. **Questions** entered in separate list to be asked and oral answers given.

**PRIVATE MEMBERS' BUSINESS**

2. \* Resolution

NGURTHANZUALA  
Secretary

---

\* Please see Bulletin Part-II No. 54, dated the 10<sup>th</sup> November, 2014 for Private Members' Resolution to be moved.

**SPEAKER** : A lama in tan chhung zawng Lalpa chu in lamah a tang a, amah in zawn chuan in hmu ang a, amah in hawisan chuan ani pawhin a hawisan ang che u.  
(II Chronicles 15:2)

Awle tunah zawhna kan la leh tawh ang a, zawhna 41-na neitu Pu Lalruatkima i lo sawm ang.

**Pu LALRUATKIMA** : Pu Speaker, ka lawm e. Ka Starred Question No. 41-na Planning and Programme Implementation Department changtu Minister zahawm tak chhan atan -

- a) State Planning Board tun term atan hian engtikah nge siam thar a nih.
- b) Tute nge State Planning Board a mawhphurtute?
- c) State Planning Board hi tun term-ah vawi engzat nge an meeting tawh ?
- d) State Planning Board-ah hian tute nge Member Secretary te tih ka zawt e.

**SPEAKER** : Planning and Programme Implementation changtu Minister zahawm tak chhang turin i lo sawm ang.

**Pu LALSAWTA, MINISTER** : Pu Speaker, member zahawm tak Pu Lalruatkima zawhna chhanna chu hetiang hi a ni :-

- a) State Planning Board tun term atan han engtikah nge siam thar a nih, tih chhanna chu kumin Ni 2 June, 2014 khan State Planning Board siam thar a ni
- b) State Planning Board-a mawhphurtute chu a hnuaia mi ang hi an ni :-
 

Chairman	-	Hon'ble Chief Minister
Vice Chairman	-	Pu Liansailova, IAS (Rtd)
Minister (Planning)	-	Member
Parliamentary Secretary (Planning)	-	Member
Secretary (Planning)	-	Ex-Officio Member & Functional Secretary
Finance Commissioner	-	Ex-Officio Member
Prof. Lianzela	-	Expert Member
Prof Vanlalchhawna	-	Expert Member
Prof. Tlanglawma	-	Expert Member
Pu P.Lianhming Thanga IAS (Rtd)	-	Fulltime Member/Member Secretary
Pu Haukhuma Hauzel (IAS (Rtd)	-	Fulltime Member/Member Secretary tih a ni
- c) Vice Chairman hovin ni 8 October, 2014 khan meeting neih a ni tawh a. Chairman hoa full Board Meeting nei thuai turin State Planning Board chungchang bakah Central lama thil kal mek dan thlir a, thu pawimawh ngaihtuah tura ruahman mek a ni.

- d) A chungá tarlan tawh ang khan fulltime member/Member Secretary 2(pahnih) Pu P.Lianhming Thanga, IAS (Rtd) leh Pu Haukhuma Hauzel, IAS (Rtd) an ni a. Functional Secretary chu Secretary, Planning & Programme Implementation Department a ni.

**SPEAKER** : Zawhbelhna Pu Ruatkima

**Pu LALRUATKIMA** : Pu Speaker ka lawm e. Hei kan hriat angin State Planning Board hi Mizoram hmasawwnna ke penna kawngah mawhphurtu lian ber kan ti lo thei lova. Ni 2.5.2014 thla nga kal ta khan din a ni a, vawikhat kan thu chauh mai a, hei aia tam deuh hi thut ni tawh se a thain ka hria a. Tin, ka zawhbelhna chu Pu Speaker, Functional Secretary kan nei a, Member Secretary pahnih kan nei bawk a, Secretary hi pathum lai mai mi 12 zingah hian kan nei a ni. Kan sum leh pai dinhmun a chhiat dan te kan hre tlang vek a, Member Secretary te hi Principal Secretary rank angin an kal bawk si a, kan sum leh pai dinhmun chhiat zia te ngaihtuahin a hautak lutuk deuh lawm ni aw tih te ka ngaihtuahnaah chuan a awm a. Tun hnaiah Functional Secretary hi September 24-a kan han neih chinah hi chuan Member Secretary ang tawh lovin full time member ang hian awm mai se a tha lawm ni. A bik takin hei kan hria a, Pu P.Lianhmingthanga IAS (Rtd) leh Pu Haukhuma Hauzel IAS (Rtd) te member Secretary, State Planning Board angin an function bawk si a, hei hi a chuangliam lo maw tih ka'n zawhbelh a.

Tin, Pu Speaker, tawi te ka sawi duh chu, kan hriat angin Central-ah Planning Commission Montek Singh Alluwah hoin an bang a. Planning Commission hi political appointment an nih angin Central lamah thiah niin ka hria a. Amaherawhchu, thawktute an la awm tho thu kan enquire vel pawhin ka hria a, chuvangin mipuite pawh hian kha lai kha kan hre fuh lo hret em aw tih ka ngaihtuahnaah chuan a awm tel a, chu chu helai remchanna lain ka'n sawi tel a ni e.

**SPEAKER** : Minister zahawm tak, chhan tur i nei em?

**Pu LALSAWTA, MINISTER** : Pu Speaker, member zahawm tak Pu Ruatkima zawhbelhna kha thu khat a ti a. An thu khat lem lo, an thu khat lo khawp a. Central lama Planning Commission Planning Board ni lovin Planning Commission ber hi thiah anih tak avangin kan kal zel dan tur hi a chiang lo va. State Planning Board te hi Planning Commission note nihna lai hi a awm ve a. Chuvang chuan keimahni lamah pawh tun kuma kan session te pawh kan hriat angin fulltime budget pawh kan neih hleih theih lohna chhan chu Plan pawisa mumal hlei theih loh

vang a ni a. Chuvangin agenda tur pawh kha a tlem angreng a, kan thu khat lova. MNF sorkar lai kha chuan an thu ngai lo an ti mai a. Tuemaw kha a thu viau a, chu chuan an tih tih in an ti an ti mai a. Keiniah hi chuan chutiang chu ni lovin Board te pawh mumal takin kan siam a, kan thu zing viau dawn a ni tih kha ka'n sawi duh a.

Tin , a pahnihna member secretary chungchang kha zawhna nge rawtna ka hre thiam lova, member zahawm tak khan an sawi deuh viau a, a zawhna ni ta ber a ka zuk ngaih chu Member Secretary pahnih neilo hian tunah functional secretary in nei tho si a, in tidanglam thei lawm ni tih kha a ni ta ber em aw! Khangkha chu tuna kan dinhmunah chuan tul kan ti lo va, tul kan tih angin kan ti mek tih kha ka chhanna a ni a. Heng Member Secretary pahnih neih leh Functional Secretary neih hi kan sorkarin uluk taka a ngaihtuahin tul a tih dan anga kan han tih mek chu a ni a

**Pu LALRUATKIMA** : Pu Speaker, ka'n interrupt lawk ang a, khawngaihin min lo hre thiam sela. Kan sum harsat dan hria a Member Secretary pahnih chuang liam neih kha a tul em? Kan dinhmun zawng zawng ngaihtuah hian Functional Secretary kan nei tawh bawk a, tih kha ka ngaihtuahnaah chuan a awm a. A tul lam ai mah khan kan dinhmun hre zawk in ni a, chuvang chuan hei hi a tul tawh kher em ni tun dinhmunah chuan, in tidanglam thei lawm ni ka ti a, tul in tih tlat chuan tul in ti a ni mai a. Mahse kan sum dinhmun en chuan keini lam chuan tul kan ti lo khawp mai tih kha ka'n sawi tel duh a ni.

**Pu LALSAWTA, MINISTER** : Pu Speaker, a tul kan ti a ni tih kha a chhanna ni rawh se. A pathumnaah member zahawm tak sawi danah chuan Planning Board a ti tak nain Planning Commission ti angah ngaihsak ila, Planning Commission an thiahna hi kan zawng chiang a, an thiahna awm reng reng a awm lo ti deuh khan a sawi niin ka hria a.

**Pu LALRUATKIMA** : Pu Speaker, min lo hre thiam lawk, ni e, a dik a, ka sawi sual a, min lo hre thiam ula. Planning Commission zawk kha a ni a. Planning Commission hi tun dinhmunah khan Montek Singh Alluwatin ho a political appointment a nih avangin term a lo tawp tak avangin sorkar thar khan a ruat thar leh dawn avangin anni ho kha an bang ta a ni. An ban si avang khan a Secretariat leh a functional leh engkim kha chu a ngai vekin a kal tho si a. Chuvangin mipui lamin Planning Commission function lo anga Pu Speaker, kan hria hi a dik tawh lo deuh lawm ni tih kha kan rawn sawi lang a ni e. Ka sawi sual palhah kha chuan min lo hre thiam dawn ni a.

**Pu LALSAWTA, MINISTER** : Pu Speaker, Planning Commission angin hna an thawk tawh lo a, Ministry of Finance-in engkim a la a, planning lam pawh a la tel vek a, chungah chuan anmahniah nihna pawimawh tak tak nei an awm avangin chungte chu kan zuk biak thin leh lehkhate kan thawn thin chu an ni mai a. Chuvang chuan Planning Commission ang hian zuk biak tur leh lehkha zuk thawn tur a awm tawh lo a ni. Chuvang chuan a muan pawh a muan phah ve deuh chuan kan hria a, Plan sum state tina han sem pawh hi a muang hle mai a, Vote on Account te pawh vawihnih lai kan neih phah kha a ni a, chu chu kan dinhmun a ni a. Engpawhnise, keini pawh state puitling kan nihna angin Planning Commission lo piang turah hian kan ngaihdaan te pawh thawn thla ve ila kan ti a, kan Chief Minister zahawm tak hovin kan buaipui mek a.

Planning chungchang hi Pu Speaker, an han zawh takah chuan kan ram tana pawimawh ber kan tinzawn tur, kan focus area ang te ngaihtuahtu tur an nih avangin a pawimawh kan ti a, Mizorama Planning Board pawh kan thuan tha sauh sauh zel chu a ni.

**SPEAKER** : Aw, Chief Minister.

**Pu LAL THANHAWLA, CHIEF MINISTER** : Pu Speaker, Planning Commission hi Central-ah chuan an thiat a, tunah hian Planning Commission a awm miah lo a ni. Tin, political appointment a ni satliah lo a, anmahni line a top specialist te an ni deuh vek a, Montek Singh Alluwah te hi World renowned economist a nihna atanga an lak a nih ka ring a. Amah Manmohan Singh-a ngei pawh kha Planning Commission ah hian Deputy Chairman a ni reng tawh thin a ni, keini pawhin kan dawr hman a. Chuvangin political appointment pawh ni sela, member ho zawng zawng kha mithiam bik chungchuan deuh vek an ni. Tin, an thiah avangin an awm darh zo tawh a, Planning Commission a awm laia kan tana tangkai ber pakhat North East mi Pramod Chaudhary tunah hian DoNER ah hian a awm daih tawh a, tunah hian an office pawh a ruak tawh a, a skilled staff, khanglaia awm thin hrim hrim kha an awm a, Planning Commission hrim hrim a hi tunah hian an thiah tawh avangin dawr tur an awm tawh lo. Chumi avanga full Budget Session pawh nei thei lo kan ni, tih hi thudik a ni mai a.

Tin, kan pawisa harsatna avanga kan State Planning Board-in a thawh tur ang thawk thei loa dah hi kan tum lo a, a harsa emaw a harsa lo emaw kan hotuten tha

an tih angin an ngaihtuah a. Tin, tih tur tam tak a awm a chumi avang chuan Secretary hi chu pisa luaha hnathawktu ber an nih avangin a tul zat zat neih hi kan hotuten tha an ti a. Tin, Planning Board hi thut fo ngai chi a nilo. A tak takah pheh chuan vawi khat thutah kum tam tak plan leh khatiang vel kha a rel theih a, Amaherawhchu engemaw review te a ngaih chang chuan thut tur a ni a. Tunah hian Mizoram State Planning Board thu tur an ni kan remchan dan kan dap mek a, a thu a thu hranpa lovang, vawikhat thutah kum 1,2,3,4,5 plan kalphung kha a rel theih a ni.

**SPEAKER** : I beisei angin a chiang tawh lo maw. Pu K. Beichhua.

**Dr. K. BEICHHUA** : Pu Speaker, kan zawhbelh leh lawk ang e. Kan Minister zahawm tak khan Board tha tak kan din tawh tih kha a rawn sawi a, a lawmawm hlein ka hria a. Advisory Board a ni a Board pawimawh tak a ni reng a, churang chuan he Board pawimawh tak hian tun term kan thlen chinah hian policy siam te a nei em? A neih chuan a tlangpuiin thu reng lo tur an ni tih te kan hria a, a tlangpui he House hi min hrih thei se tih kha ka rawn ngen a. Tin, Sorkar hmalaknaah hian advice pek tawh te pawh tam tak an neiin ka ring a, an neih chuan eng advice te nge Sorkarah hian an pek tawh tih kha min hrih theih chuan ka lawm viau ang.

\* Speech not Corrected

**SPEAKER** : Chhang turin Minister zahawm tak Pu Lalsawta.

**Pu LALSAWTA, MINISTER** : Pu Speaker, member zahawm tak Pu K.Beichhua zawhna, Mizoram State Planning Board hian Policy te a duang tur a ni a, chutah chuan sorkar rawn hriattir a nei tawh em tih te leh hriattir a nih chuan sawi theih a awm em tih te a ni a. Hei hi advisory a ni tih kan hria a, engemaw lai kha chuan Advisory ang lo a executive anga kal deuh te a awm thin a. Advisory a nihna ang leh State Government kut ke ber an nihna ang hian anmahni hetah pawh kan tarlan tawh angin Vice Chairman ho hian an lo thukhawm tawh a, kan state tana thil pawimawh tam tak an ngaihtuah tawh a. Mahse formal takin State Government-ah an la rawn communicate lova. Amaherawhchu ni tin inbe reng thei kan nih avang leh anmahni te nena implementation department a awm an nih avangin an ngaihpawimawh te kan hriatpui zel tho a. Chutianga formal taka an rawn tih tur hun ni a ka rin chu full board meeting kan tih Chief Minister

chairman a nihna a tul an tih huna an thut hun ah chuan State Government-ah policy chungchang te, thurawn te chu an la rawn pe turah kan beisei a, chu chu tuna kan awm mek dan chu a ni.

**SPEAKER** : Starred Question No. 42-naah kal tawh ila. MLA zahawm tak Pu Lalruatkima'n a zawhna 42-na rawn zawt sela.

**Pu LALRUATKIMA** : Pu Speaker, ka lawm e. Ka Starred Question 42-na Food, Civil Supplies & Consumer Affairs Minister chhan atan :-

- a) Kohhran leh tlawmngai pawl hrang hrangte inkhawmpuiah buhfai pek thin a ni em?
- b) A nih chuan Kum 2012-2013, 2013-2014 leh 2014-2015 chhungin kohhran leh tlawmngai pawl hrang hrangte inkhawmpuiah engzat nge buhfai pek a nih tih te a ni.

**SPEAKER** : Chhang turin a changtu Minister zahawm tak Pu John Rotluangliana.

**Pu JOHN ROTLUANGLIANA, MINISTER** : Pu Speaker, Member zahawm tak Pu Lalruatkima starred question no. 42-na chhanna chu:-

- a) Kohhran leh Tlawmngai pawl hrang hrangte Inkhawmpuiah Ration Buhfai a remchan anga ren taka pek thin a ni.
- b) Kum 2012-2013, 2013-2014, 2014-2015 chhunga Kohhran leh Tlawmngai pawl hrang hrangte Inkhawmpuina atana pek zat a hrana chhinchhiahna a awm lo.

**SPEAKER** : Zawhbelhna Pu Lalruatkima.

**Pu LALRUATKIMA** : Pu Speaker, ka lawm e. Vanglaini chanchinbuah khan kan Minister zahawm tak khan Kohhran khawmpui leh tlawmngai pawl hrang hrang khawmpui hian kan ration buhfai hi min ei hek sak nasa em em a, hengah te hian keimahni kan intodelh tur a ni tiin a sawi thu te kan lo chhiarin kan lo hmu a. Chutih lai chuan India ramah te mipui punkhawmna Yatra ropui tak takah te pawh mipui ei tur leh security te an sorkarin a ngaihtuhsak thin a ni. Ration buhfai kha a thlawnin an rawn demand ka ring hauh lo a, an khul ve thin turah ka ngai a. Chuvangin helai hi ren taka pek thin a

ni tih kha a lawmawm khawp mai a, ren loh tur chi pawh a ni lo a. Chulaiah chuan ka'n zawhbelhna chu Christmas vuakvet a lo thleng dawn a, chungah chuan buhfai hi ration rate-in kohhrante kan inang lo a, kohhran thenkhatin an rawn beisei leh a nih chuan pek theih an ni ang em tih kha ka zawhbelh a ni e.

**SPEAKER** : Chhang turin Minister ilo ko ang.

**Pu JOHN ROTLUANGLIANA, MINISTER** : Pu Speaker, ka chhan hmain zawh belhna ka nei ve a. Chu chu khawi state-ah te nge mipui pung khawm sorkar-in buhfai an pek tih te kha ka zawt let ve a. Tin, krismas leh kum thar vuak vetah hian a theih hram chuan kohran hrang hrangte hian ration buhfai lo deuh hian krismas te hi a hman theih lawm ni, a bik takin Aizawl khawpui chhungah te hi chuan ti in mipui leh kohhran pawl hrang hrangte kan ngen mai a ni. Engpawh ni sela, an neih loh miau chuan an ei tur ngaihtuatu kan ni a, kan pe tur a ni . Amaherawhchu, tun din hmunah hetiangah kan han sawina chhan hi kan hriat theuh angin mega block kan ti a, rail Lumding-Badalpur-Silchar-Bairabi kawng broad gage a coversion an tih avangin rail a lo kal tawh lo a, by road veka a rawn kal avangin buhfai hi tlak chham thut kan hlah avangin inren tlang teh ang u tiin kan ngen mai a ni, Pu Speaker.

**SPEAKER** : Aw le, zawhbelhna kan nei

**Pu LALRUATKIMA** : Pu Speaker, a zawhletna kha ni e, Rath yatra te, yatra ropui tak tak te India ram hmun hrang hrangah sakhua avangin a awm thin a, chungah te chuan U.P sorkar te, Bihar sorkar te pawhin mipui ei tur hi a ngaihtuhsak thin a ni tih chanchinbuah te pawh kan hmu fo thinin ka ring a. Chuvang chuan keini pawhin a thlawnin kohran leh tlawmngai pawl khawmpui thin te khan an beisei hauh lo va, ration rate a khulh te kha inthlahrung takin an rawn dil thin a ni. Kha tiang kha kan lo hrethiam zel thei lo em ni? Mipui ei tur kha a hranpain Pu Speaker, a thlawnin an rawn beisei hauh lo a, thil tha ngaihtuah a ni a, citizen te vek kan ni a, kha kha chu sorkar mawhpurh tur a ni dawn lawm ni tih kha ka'n sawi belh a ni.

**SPEAKER** : Minister-in a chhang leh ang.

**Pu JOHN ROTLUANGLIANA, MINISTER** : Pu Speaker, mipui ei tur hi sorkarin a ngaihtuah a, chu chu anmahni theuhin ration card hmangin an in lamah an la a ni. A hranpaa inkhawmpuina atan sorkar ngaihtuah tur a ni lo a, Amaherawhchu, an rawn dil a, sorkarin



hriatthiamnain kan pe zawk a ni. Tin, India ram hmun hranga yatra tih te, Koompmela tih te lamin sakhaw thil a ni a, an pawl hotuten an ngaihtuah a ni ang, sorkarin a ngaihtuah sak ngai lo.

**SPEAKER** : Awle zawhna 43-naah kal ila, Pu R.L.Pianmawia, member zahawm takin zawt sela.

**Pu R.L. PIANMAWIA** : Pu Speaker, ka zawhna No. 43-na Higher & Technical Education Minister zahawm tak chhan atan:-

- a) Mizoram Scholarship Board hian Research beitunge tan Scholarship a pe thei em?
- b) Kum 5 chhungin mi pakhat tan vawi engzat nge dil theih a nih?
- c) Scholarship dil tumte tan advertisement chhuah a ni em?

**SPEAKER** : Higher & Technical Minister zahawm tak Pu R.Romawia chhang turin i sawm ang.

**Pu R. ROMAWIA, MINISTER** : Pu Speaker, MLA zahawm tak Pu R.L.Pianmawia zawhna chhanna chu:-

- a) Pe thei e.
- b) Junior Research Fellowship tan kum khatah vawi khat(1), Senior research Fellowship tan kum hnihah vawi hnih (2).
- c) Ni e, kumtin advertisement chhuah thin a ni (Kum 2014-2015 chhung hian plan Allocation tihfel a la nih loh avangin advertisement hi chhuah a la ni lo) tih a ni e. Ka lawm e.

**SPEAKER** : Pu R.L. Pianmawia zawhbelhna

**Pu R. L. PIANMAWIA** : Pu Speaker, advertisement hi (a thawktu) a dealing-in kan chhuah ngai lo a ti a. Kan nauten kuminah pawh khan an buaipui a, nikumah pawh an dil a an hmu lo a, kumin September thla te pawh khan an va ngaihven leh a thla lehah a dil theih ang tiin tawngkain an lo chhang a, thla lehah dil a nih chuan September thla khan a hmutute chu kan thlang fel vek tawh ti a chhan a ni leh a. Chuvang chuan advertisement hi chhuah a ni lo tih hi a chiang tawkin ka hria. Hemi chungchang hi kan Minister hian khawngaih takin tun hnuah hetianga buai miah tawh lo tur hian min lo chinfel sak thei ang em?

**SPEAKER** : Minister zahawm takin chhang se.

**Pu R. ROMAWIA, MINISTER** : Pu Speaker, kan member zahawm tak kha a thusawiah khan a chiang hle a nih chuan, hei hi chu ka lo enfiah turah ka ngai a. Tin, kumtin advertisement chhuah thin a ni ti si a an lo chhuah lo a nih chuan ka mawha dah ngam turah ka ngai a. Mahse kan hriat danah chuan an chhuah ngei thin a, Kumin erawh chu 2014-15 chu plan allocation tihfel a nih loh avangin sawtilaia kan neih theih tur zat kha engmah hriat a nih tak loh avang khan kan theih leh theih dawn loh hre chiang lova chhuah kha tih chi pawh a nih loh avangin kan chhuah lova. Tin, member zahawm tak ten min hriatpui tura ka duh nghal chu hemi mahni plan fund atanga heng hi tih a nih avang hian, a plan fund allocation-ah hian Scholarship Board hi kan chau hle mai a, chuvang chuan heng pawh hi kan ti thei ang nge thei lovang tih hi vawiin thlengin kan la chiang lo va. Chutiang ang dinhmun chu House pawhin min lo hriatpui ka duh a, tih theih ngei kan chak khawp a. Amaherawhchu, kan sum dinhmun atangin advertisement pawh hi kan chhuah thei ang nge thei lovang tih ngaihtuah mekin kan la awm a ni.

**SPEAKER** : Zawhna 44-na zawt turin MLA zahawm tak Dr. K.Beichhua i sawm ang.

**Dr. K. BEICHHUA** : Pu Speaker, ka lawm e, kan Minister PHE changtu hnena ka zawhna chu Greater Water Supply Scheme Saiha leh Lawngtlai te hi engtika commission tur nge? tih a ni e.

\* Speech not corrected

**SPEAKER** : PHE Minister zahawm tak Pu Zodintluanga i sawm ang.

**Pu ZODINTLUANGA, MINISTER** : Pu Speaker, kan member zahawm tak Pu K.Beichhua starred question 44-na chhanna chu, Greater Saiha Supply Scheme hi March, 2015-ah Commission tum a ni a, Greater Lawngtlai Water Supply Scheme erawh hi chu May, 2015-ah Commission tum a ni.

Tin Pu Speaker House-ah lawmthu sawina tlem han neih nghal ka duh a. Hemi Water Supply Scheme te hi kan Subject Committee, kan Member zahawm tak Pu Lalrobiaka chairman-na hnuaiah kan Member Pu Beichhua te, Er.Lalrinawma te nen a hmunah te min va ensak

a. Pu Speaker harsatna an neih ang chi te nasa takin min tanpui a, anmahni zarah a hun taka kan zawh theih kan beisei a ni tih kha ka rawn sawi tel a ni e.

\* Speech not corrected

**SPEAKER** : Zawhbelhna pawh awm thei lo tur a ni ang, kan lawm tlang a nih chu. No. 45-naah kan kal thei Er. Lalrinawma, member zahawm takin a zawhna rawn zawt sela.

**Er. LALRINAWMA** : Environment & Forests changtu Minister zahawm tak hnena ka zawhna chu Tawi Wildlife Sanctuary siam a nih theihna tur atan a chehvel khua ten ram an pek avanga hamthatna an dawn tur item hrang hrangte kha pek kim a ni tawh em ? tih ka zawt e.

**SPEAKER** : Minister zahawm tak Pu Lalrinmawia Ralte chhang turin ilo sawm ang.

**Pu LALRINMAWIA RALTE, MINISTER** : Pu Speaker, Member zahawm tak Tuikum bialtu Er. Lalrinawma zawhna Tawi Wildlife Sanctuary siam a nih theihna tur atan a chhehvel khua ten ram an pek avanga hamthatna an dawn tur item hrang hrangte kha pek kim a ni tawh em ? tih chhanna chu, Tawi Wildlife Sanctuary siamna atan hian a chehvel khua ten ram an donate lo a. Amaherawhchu, Centrally Sponsor Scheme (CSS) leh Forests Development Agency (FDA) atangtein tanpuina (benefit) awm thei ang ang te chu pek an ni tawh thin a ni, ka lawm e.

\* Speech not corrected

**Er. LALRINAWMA** : Pu Speaker, anih loh leh Sanctuary lak a nih dawn lai a khawtlang hruaitute leh V/C te rawn an nih khan an ram a nilo tihna em ni ? tih ka zawt e.

**Pu K. SANGTHUAMA** : Pu Speaker, zawhbelhna siam ka duh hi a inmil chiah em, a nih loh pawhin khawngaihin min lo ngaihthlaksak ta ula, Saw-mill leh wood industry din phalna sorkarin a pek te hi engvanga tihtawp sak nge tih ka zawt a. Mi 20 lai tihtawp sak an ni a, hemi chungchangah hian an mangang khawp mai a, loan tam tak nuai 20/30 an lo la a, chuvangin hei hi chiang deuh hlekin kan Minister zahawm tak hian min han hrilhfiah sak se tih kha ka ngen pahin kan zawt bawk a ni e.

**Pu LALRINMAWIA RALTE, MINISTER** : Pu Speaker, Wildlife Sanctuary te, National Park te, Tiger Reserve te pawh a ni ang a. Hetiang hi a pian dan han sawifiah lawk a ngaiin ka hria a. Member zahawm tak zawhna atang leh mipui ngaihdan ni a lang chu ram hi a pek a pek a ni a, pek a nih dawnin condition awma pek a ni a. Kan pe a nih chuan chung chu min tihsak ula ti a agreement siama sanctuary hi piang a ang riau a, chuvang chuan kan chhanna kha khatiang kha a nilo thei lova.

Sanctuary a pian dawn hian Governor-in helai hmunah hian nungcha te, thing leh mau te ram hmul humhalhna a tul em avangin helai area-ah hian sanctuary siam tum a ni tiin a duh lai laiah hian notification a siam tawp theia, chutiang chuan kum 2001-ah khan preliminary notification siam a ni a, chu chu Wildlife Protection Act, 1972 a section 18 – 26-na chhungah hian khami siam dan tur kha condition zam sa vek a awm a, chumi zawm chuan notification siam a ni a. Chumi rualin Sanctuary an propose chhungah khan mimal ram nei buaipui ngai an awm dawn a nih chuan District Collector-in verify se, inquiry la se tiin a inquiry lak te pawh chu notification siam atanga ni 60 chhungin a thehlut tur a ni tih a ni a. Chutianga Preliminary Notification te siam a nih a, D.C-in a hmunah kal te pawhin a enfiah a ni ang chu 16<sup>th</sup> November, 2001 khan Mizoram Gazettee-ah thil awmzia te District Collector tira a hmuna a enfiah vek tawh hnuah engkim a fel avanga he Tawi Wildlife Sanctuary 35.75sq km a zau hi Sanctuary-ah puan a ni ta a ni tiin sorkarin notification Mizoram Gazettee-ah a rawn chhuah ta a ni a.

Tuna Member zahawm takin a rawn zawhbelhna lai taka kha V/C te rawn an nih dan kha tuna hetia zawhna a lo luh hian kan hre ve phak chiah lova District Collector-in a han tlawh ngei tur chu a ni a, a hmun vel te pawh a enin a chhungah hian mimal ram chinfel ngai te Land Acquisition Act hman ngai hial ang chi te pawh a awm em tih te a enfiah tur a ni a. Amaherawhchu, sorkar hmasaa mi ten engkim a fel thlap a ni ang chu tiang hian final notification hi siam a lo ni ta a. Chuti chungin a chhehvel khua Lenchim, Mualpheng, Tawizo, Maite, Hmuntha, Hualtu-ah te khian eng eng emaw hamthatna Sanctuary leh National Park leh Tiger Reserve hualveltu finch village ho tana hamthatna awm thei chi ang ang hi chu theihtawpin Department-in a ti ve tawh a ni tih kha mipuite lungawina khawp chu a tling kherlo maithei e, amaherawhchu phak tawh leh sum awm ang angah chuan kan lo ti tawh a ni.

Member zahawm tak Aizawl West-I bialtu Pu K. Sangthuama zawhbelhna kha fiah takin a duhthusam chuan ka chhang thei kherin ka ring lova, kan rules kha a felfai tawk loh avangin siamthat a ni a, rules thar kan nei ta a khami hnuaiiah khan, engkim a thara tih a ngai ta a. Chuvang chuan khangte pawh kha han chinfel a tih thar leh theih a nih chuan chungte pawh chu tih leh te pawh ni thei turah ngai ila kan lo enzui ang a, kan enzui mek a.

Tin, hmun hrang hrangah Saw-mill pangngai dik tak ang a len zawng inthlau te pawh kha a awm ve a ni, khatiang chi kha. Supreme Court direction ang chauha din tur a nih avangin a hma khan kan rules neih lai kha hman hleihtheih loh ni bawk duh ang rules neilo chung khan kan lo kal a, a practical vak lova. A blade len zawng tih te, vertical bend saw a ha sei zawng tih te, diklo lutuk khan rules kha kan lo nei a hman hleihtheih lovin. Chuvangin, enchian a ngai kan ti a tunah pawh hian, dan thar kan neih hnuah hian. Tute pawi mah kan sawi lovang a Pu Speaker, hnamdangte nena intiam rual a, a neitu dik tak hnamdang ni si Saw-mill pawh kha a awm ru deuh reuh a hriat te pawh a ni. Engpawhnise, dan thar fel tak kan nei tawh a, khami chhanah khan kan lo ennawn ang a, khawngaihin Member zahawm tak pawh khanin khatiang kha kan hotute hnenah pawh min hriattir theih chuan a lawmawm hle ang a an dinhmun dik tak te kan lo enfiah dawn nia Pu Speaker, ka lawm e.

\* Speech not corrected

**Pu K. SANGTHUAMA** : Pu Speaker, ka lawm e. Hei, harsatna an tawk nasa a, tunah phei chuan NLUP ah hian thingzai khawl tam tak pekchhuah a ni bawk nen a rang lama chinfel theih ni se a lawmawm ngawtin ka ring a. Khawthlang lamah hian harsatna kan tawk nasa lehzual a. Kawrthah tlangdungah khu chuan phalna mumal takin an ti law law a, chutah chuan vai ho hlir khu a hlawkna teltu an ni a, zai loh khuan an phur thla zung zung a kan thingzai teak te hi trip tam tak Airport leh Sairang velah te hian mill tam tak din a ni ve bawk a, hengho hian harsatna an tawk zual a, ram pumpuiah harsatna kan tawk a.

Tin, kan sorkarin NLUP a mill a pek te tan pawh hian harsatna a awm chho zel dawn niin a lang a, chuvangin ka'n ngen duh chu, a rang lama he thil hi rawn chingfel turin vawiinah hian House hmaah kan Minister zahawm tak ka ngen duh a ni e.

**SPEAKER** : Zawhna neitu Er. Lalrinawma ilo sawm ang.

**Er. LALRINAWMA** : A chhanna kha khatiang kha a ni a, amaherawhchu, khilai a sanctuary din a nih dawn lai khian khilalaiah an pi leh pute atanga rama an lo neih tawh V/C area chhunga mi tam tam te sahthlak a lo ngai a, khatah khan Forest hotute pawh lo kalin leh thil tam tak rawn tiin leh V/C te pawn rem an tih theih nan leh kawng an siam theih nan te leh gas pek te, vawkte pek te leh thil tam tak kha pe tura han sawi a ni a. Amaherawhchu, mipuiten an beisei a pha ta lova, hmanna Subordinate Legislation Committee-ah khan Forest hotute ka zawt tawh nghe nghe bawk a, min chhannaah khan he thil hi kal thei niawm khan a sawi nghe nghe a chutiang te chu a ni a. Mipuiina an pi leh pute atanga an ram anga an lo neih tawh Lo neih nana an hman te khilai chhehvel khua zawng zawngten an lo ram anga an lo neih tawh a ni a, heng laksak a nih laia mipuitena an beisei pha ta lo laia hi kan Minister zahawm tak hian a chhunzawmna emaw, entirnan, gas te pawh a hunlaia a khaw kipa dawn te an lo beisei ta a, Vawkte te pawh a niang chu, Tuizem te pawh. Khatiang khanin beisei kha a pha ta lova chulaiah chuanin hma min lak sak zawm zel thei em tih kha ka zawhbelhna a ni e, ka lawm e.

**Pu LALRINMAWIA RALTE, MINISTER** : Pu Speaker, zawhna a ni a theih angin ka'n chhang leh lawk anga. Kum 2006-2007, 2007-2008, 2008-2009, 2009-2010, 2010-2011 khami thleng kha theih ang ang chuan hma kan lo la tawh a. LPG connection hi chhungkaw 395 fringe village ho hnenah pek a ni tawh a, tin, Vawk vulh tanpuina hi chhungkaw 125 hnenah pek a ni tawh a, tin, Ar vulh tanpuina hi chhungkaw 31, tin, Sangha khawina tur tanpuina chhungkaw 45 hnenah kan lo pe tawh a. Member zahawm takin a zawh ang leh mipuite aiawha a rawn ngen ang khan tanpuina awmthei ang leh tih theih kan neih ang ang te chu kan tizui zel ang Pu Speaker.

\* Speech not corrected

**SPEAKER** : Awle, zawhna 46-na Er. Lalrinawma bawkin rawn zawt leh se.

**Er. LALRINAWMA** : Pu Speaker ka lawm e. Taxation Department changtu Minister zahawm tak chhan atana ka zawhna chu hei hi a ni e. Mizoram a Construction of Works a VAT rate hi a to hle mai a, hei hi tihhniam theih a ni em? tih kha ka zawt e.

**Pu LALSAWTA, MINISTER** : Member zahawm tak Er. Lalrinawma, Tuikum bialtu zawhna chhanna chu hetiang hi a ni :-

Mizoram Sawrkar chuan construction of works a VAT rate te hi sub-section (3) of section 11 read with section 19 of The Mizoram Value Added Tax Act, 2005 (Act No. 1 of 2005) hmangin a tihniamin a tisang thei a ni tih a ni e.

**Er. LALRINAWMA** : Pu Speaker ka lawm e. Nia construction of works bika chhiah lak laia hi kan sawi duh lai chu, za zela sawmthum deduct a nih hnuah sawmsarih la bang atang khanin 13.5% hi lak tura tih a ni a, hei hi overall atanga lak chuan ` 9.45% ang a ni. Tu contract thawk mah hi a dan anga lak ni ta selangin an hlawk dawn lo reng reng tihna a ni ta a, ` 9.45% kan lak chuan nuai zaah chuan nuai kua leh singli leh sangnga a kha kan chhiah pek tur ang a lo ni dawn ta a, helai hi contractor-te hmakhua thlirin ennawn hi a ngai khawpin ka hria a. Hei tah hian chianguang takin a lang a, chu mai piah lama ka'n zawh belh duh chu, tunah hian Mizoram pawn atanga contractor lokalte leh Mizoram chhunga contractor awm sa te hi an tax pek chungchang hi engzat nge assess a nih tawh tih hi ka'n zawhbelh duh a ni.

**Pu K. SANGTHUAMA** : Pu Speaker, tunlai sumdawng mi leh dawrkaiten an buaipui ber pakhat kan hre theuhin ka ring a, online shopping chungchang hi a pawimawh hlein ka hria a. Hei thla tin an chhut danin nuai 87 vel hi VAT lak lohin Mizoramah hian a leng vel niin hriat a ni a, chu chu Kerela State-a mi Amazon tih te, Jabong tih te leh company hrang hrang hian an rawn buaipui a, chuvangin, dawrkai hote leh mi tam tak hian inhralh theih loh phah nan an lo hmang bawk nen, tax lak loh, VAT lak loh a ni bawk si a, chuvangin online shopping, tuna Mizorama nasa taka awm hi tihtawp tumna a awm em tih kha ka'n zawt a ni.

**Pu LALSAWTA, MINISTER** : Pu Deputy Speaker, Er. Lalrinawma zawhbelhna tihhniam theih a ni em tihah hian tihniamin sak theih deuhhleik dan kawng a awm lawm ni ti ang deuhhleik a nihna lai leh khalaiah khan hetiang contractor-te hi option pek an ni a, nichina a rawn sawi ang te kha thil awmdan chu a ni a. Amaherawhchu, a tlangpuiin kan option-ah hian tax deduction of source kan tih ang chi deuh khan a kal deuh tlangpui a, chumiah chuan association hian 3% in min tihsak thei lawm ni tiin hun kal tawhah khan

sawrkarah an rawn dil a, mahse anmahni dinhmun te hrethiamin an dil aia hniam 2% ah fix sak an ni ta zawk a, chu chu ka chhanna a ni a.

Tin, zawhbelhna kan member zahawm tak Pu K. Sangthuama rawn zawh online shopping chungchang khan Taxation Department lu hi a tihai khawp a. Sumdawng thenkhat a bikin incheina lam te, cosmetic lam te, pheikhawk te, bag te, tarmit te leh thil dang thleng hian online shopping-ah an la zung zung thei a, a speed pawh a chak viau nghe nghe a. Tin, a quality pawh vawiin thleng hian tha tak tak te a ni a. Chung avang chuan sumdawng zingah harsatna tawk an awm a, a bik takin dawrkai changkang deuh i ti mai ang, Millennium Centre-a mi thenkhatte phei chu dawr khar ta tawp te pawh an awm tih te kan hria a, hei hi Department-in kan ngaihtuah mek a.

Kawng khatnaah chuan khawvelin hun thar a tawng a, 21<sup>st</sup> century-te kan lo ni ta a, chu blessing of the century malsawmna a rawn thlen ve keinin lo um lo um kha kan tih tur a ni ang em aw! Awlsam zawk leh man tlawm zawka lo lak theih kha chuan kan ti a. Amaherawhchu, a lehlamah chuan kan dinhmun Mizoram State harsat mai bakah Kerela a ni emaw, Gujarat ani emaw, State dangte pawhin an sum lut tur tam tak an chan chungchang hi chu kan hre tlang vek mai a, chutiang karah chuan engtiang takin nge kan tih ang. Tin, tax dawn ta ila tax in a ken tlat pawimawh tak chu kan va tax a te kha kan thunun a ngai thin a, kan thuhnuaia an awm, 'return pe rawh u,' kan tih hunah te a tul viau phei chuan hrem thleng pawha kan thunun te a ngai thin a. Mahse tuna online advantage hmangtute hi an tam a, khatia han in register seng pawh kha an ni chiah lova, chung avang chuan ngaihtuah a tam khawp a. Mahse tunah hian entry tax Mizoram-a bungrua pawnlam atanga rawn lut hrim hrim tax dan hi kan draft mek a, cabinet hmasa berah te chuan kan thelulh theih ka ring a.

A tihtawp tumna ang zawng hi chu tha kan ti lo ti mai ang, 21<sup>st</sup> century-in a rawn ken luh a ni a, kan state-a sum lut kan duh vang ringawta tihtawp chiah kan ngai lo va, amaherawhchu, keini chu sawi loh Central India Government pawh khuan a buaipui em em a, hengah hian chhiah lak theih dan tur kawng te pawh a courier lamah te hian chhiah te hi ti dawn ta ila kan han ti a, mahse courier service te hi vai te an lo ni lehzal a; vai han register te kha kan duh lova, sawrkar chuan kan thei lo nilovin kan duh lo a ni. Chungte avang chuan India ram hi sorkar state tam tak zingah a bik takin North East-ah phei chuan sumdawna lama a mi chengtena kan la chelh hram hram awmna chhun a ni a.



Heng hi humhalh kan tum a, heng humhalh kan tumna lamah hian tunah online shopping chungchangte agenda-ah te pawh hian a rawn tel ve a, uluk takin kan ngaihtuah a, Mizoramah hian Mizo sumdawngte ngei hi sumdawng chhunzawm zel se tih te hi kan duh dan ber a ni a. Sumdawng community pawhin chu chu an rawn sawi thin a ni a.

Chuvangin online shopping chungchang hi agenda nung tak, ngaihtuah ngai tak a ni a. Amaherawhchu, State tinin lo hmahruai tura han tih hi keini tihturah kan ngai lova, India sorkar meuh pawhin a buaipui a, keini aia State changkang leh a hmang tam deuhte pawhin an la buaipui mek a ni a.

Tin, he thil hi kan sawi tawh ang khan Pu Deputy Speaker, tihtawp tumna lam aiin engtin nge kan regulate ang, engtin nge hei hi kan thununna hnuaiah kan dah theih ang tih hi kan ngaih pawimawh ber a ni a. Tin, online shopping kan sawi hian Kerala atangin emaw, Bihar lam atang emawa lo kal ngawt hi a ni lova, international operation a ni a, ram tam tak atangin hei hi a kal mek a ni a. Chuvang chuan keini pawhin kan ngaihtuah ve hi tangkai tak a nih rualin Central sorkarin a buaipui dan te, state dang sorkarin a buaipui dan te pawh ngaihtuah zel a, keinin nung taka kan la ngaihtuah chhunzawm hi tuna kan tih theih chu a ni e.

**DEPUTY SPEAKER** : A fiah viau lawm ni? Zawhbelhna a awm em? Aw, Pu Sangthuama.

**Pu K. SANGTHUAMA** : Pu Deputy Speaker, ka zawhna tur pakhat ka lo tih theihngihl a. Tunlai hian chhiah an khawn a, Taxation chhan tur nge? Revenue lam chhan tur ka hre lova, min lo ngaidam ula, Thingtlang lamah hian chhiah an khawn mek a, chu chu 40% velin a pung niin kan hria e, an ti a. Hei hi a sang angreng khawp mai a. Hei hi a dik reng em? tih leh a sanna chhan pawh hi min hrilh theih chuan ka'n zawt nghal a, a lawmawm khawp ang a.

Tuna kan Minister zahawm tak, Taxation changtu pawhin a rawn sawi kha a dik khawp mai a. Kerela pawhin an buaipui a, tunah hian an buai chur chur a. Online a sumdawng ho tihtawp turin sorkarah nasa takin an bei a, a har ve tho a. Chuvangin State tinin an buaipui a, mahse, kan Minister zahawm takin a sawi ang khan engemawtia a tihtawp theih loh a nih pawhin pawisa kan hmuh theihna tal hi chu ngaihtuah chhunzawm zel ni ta sela, state tam

takina an buaipui hi thla khata crore tel hmuh theihna mai sumdawna a tihdan kawng tha zawk anrawn dap theih chuan la tha tho turah ngai ta ila.

Ka zawhna pakhat 40% laia kan chhiah khawn tuna sang ta hi enge a chhan tih leh a sang deuh a ni lawm ni? A tihhniam theih deuh em? tih kha ka'n zawt leh teh ang.

**DEPUTY SPEAKER** : Ngawi rawh, a chhan hmain, phar leh kha inawm a. Amaherawhchu, nichinah zawhna in zawt tawh a, zawh belhna in ti a, khata chhanna atanga zawh belhna tih zel kha chuan pakhat hian kan inbawk reng dawn a. Chuvangin a chhanna atanga hriat fiah loh in neih chuan zawhna dang rualin emaw, nidangah emaw in zawt leh thei tho a, tuna a chhanna atanga zawhna dang piang zel a kha kan ti tawh lo ang. Kha kha hemi atan chuan kan duh tawk ang a. Tin, Taxation Minister kha a concerned a ni em kha thil kha, Land Revenue lam te a ni zawk em ?

**Pu LALSAWTA, MINISTER** : Pu Deputy Speaker, 40% a tax tihpun kan nei lova, Taxation lam chu a ni lovang.

**DEPUTY SPEAKER** : A nih chuan zawhna dangah kan kal ang a, Starred Question No. 47-na zawt turin Pu R.L.Pianmawia ilo sawm ang.

**Pu R.L. PIANMAWIA** : Pu Deputy Speaker, PHE Minister zahawm tak chhan atan - Tuizem awmsa thawm that ka dil Sunhluchhip, Thingsat, Khawpuar leh Chhanchhuahna Khawpui te kha thawm that a ni ta em ?

**DEPUTY SPEAKER** : Le, chhang turin, PHE Minister zahawm tak Pu Zodintluanga ilo sawm ang.

**Pu ZODINTLUANGA, MINISTER** : Pu Deputy Speaker, kan member zahawm tak Pu R.L.Pianmawia Starred Question No. 47 chhanna chu - Sunhluchhip, Thingsat, Khawpuar leh Chhanchhuahna Khawpui-a tuizem awmsa te thawm thatna tur a hranpaa fund (pawisa) sanction a awm rih loh avangin thawm that an la ni rih lo, tih a ni e.

\* Speech not corrected

**DEPUTY SPEAKER** : Zawhbelhna Pu R.L. Pianmawia

**Pu R.L. PIANMAWIA** : Pu Deputy Speaker, a thawm thatna tur hian pawisa a awm tih a ni a, amaherawhchu, a tuidawn siam nan sum tam tak a kal ral si a. Chuvang chuan tun thla ni 5 khan Cameraman te nen hmalak dan te thlithlaiin kan kal a. Chuvang chuan kan mamawhna hi a la sang em em mai a, heti lam hawi zawng hian sorkarin hma min lak sak thei ang em ?

**DEPUTY SPEAKER** : Chhang turin Minister ilo sawm leh ang.

**Pu ZODINTLUANGA, MINISTER** : Pu Deputy Speaker, hei Sunhluchhip, Thingsat, Khawpuar leh Chhanchhuahna Khawpui te Tuizem awmsa hi thawmthat a ngai tih kan hria a, fund te kan han dap kual a, Mizoram pumpuiah buaipui a ngai bawk si a, tunah hian Sunhluchhip bik atan hian NRPW hnuai a cheng nuai 12.28 kan dah a, chung ang atang chuan tuizem awmsa te a chung khuha siam mek a ni a. Amaherawhchu, nichina kan sawi tawh ang khan tunah hian fund te hi dawn a la nih loh avangin kan la tan thei lo a ni e.

\* Speech not corrected

**DEPUTY SPEAKER** : A fiah e. Le, tunah hian hun tlem kan la nei a, Starred Question No. 48-na zawt turin Dr. K.Beichhua ilo sawm ang.

**Dr. K. BEICHHUA** : Pu Deputy Speaker, ka lawm e. Kan Minister zahawm tak PHE hnuai a ka zawhna chu, Mizoram District hrang hrangah Sanitation Board din a ni tawh em ? La din loh ni ta se din tumna a awm em ? tih hi ka zawhna a ni e.

\* Speech not corrected

**DEPUTY SPEAKER** : Chhang turin Minister zahawm tak Pu Zodintluanga ilo sawm ang.

**Pu ZODINTLUANGA, MINISTER** : Pu Deputy Speaker, kan member zahawm tak Dr. K.Beichhua zawhna Starred Question No. 48 na chhanna chu, Mizoram District hrang hrangah Sanitation Board din a la ni lova, din tumna a awm rih lo tih a ni e.

\* Speech not corrected

**DEPUTY SPEAKER** : Zawhbelhna a awm em ? Aw, Dr. K.Beichhua

**Dr. K.BEICHHUA** : Pu Deputy Speaker kan Lal Isua ngei khan Sanitation hi a ngaipawimawh viauva, ringtute chuan kan ngaihpawimawh turah ka ngai a. India hnampa Mahatma Gandhi pawh khan a ngai pawimawh a, chuvang chuan kan ngaihpawimawh hi kan tih turah ka ngai a. Tuna kan Prime Minister zahawm tak Pu Modi pawh hian a ngaipawimawh hle a. Swach Bharat tih hian tunah hian Sanitation ropui tak India hian hma ala a, an kalpui mawp mawp a ni. Chutih lai chuan kan ramah pawh kan Chief Minister hian a ngaipawimawh hle a, hei hi engati nge din a nih loh? kan din mai loh. Thianghlimna kawngah hian ringtu zaah za State-ah hi chuan kan tih tur ngawih ngawih a ni lawm ni? Din theih ni se a va tha mai awm ve tih kha ka rawtna a ni a. Kan hmalamah hian khawngaihtakin kan Minister zahawm tak hian hma a la thei angem ? Sport-ah te pawh chak takin hma a la zung zung a, ngatinge hetah thianghlimnaah hian a la tum loh? tih kha ka zawhna a ni e.

\* Speech not corrected

**DEPUTY SPEAKER** : Minister ilo sawm ang.

**Pu ZODINTLUANGA, MINISTER** : Pu Speaker, kan member zahawm tak rawn zawhna kha District hrang hrangah Sanitation Board a nei a, Sanitation hmalakna hi Urban Bharat Ubian guideline hmangin kan kalpui a, chumi hnuaiah chuan Mizoram pumah hmalak a ni a, Village level-ah Village Water Sanitation kan din a, chumi hnuaiah chuan Chairman VCP a ni a, Vice chairman-ah chuan Branch YMA te, YMA awmlohnaah chuan NGO te, chutiangin Secretary-ah chuan School Teacher leh MUP te, chutiang chuan NGO te nen khan din a ni a. Chu chu Central Sorkar quideline a ni.

Nirman Bharat Abhiance hnuaiah District level-ah hian District Water Sanitation committee din a ni bawk a. Chutah chuan Chairman chu Deputy Commissioner a ni a. Member Secretary chu Executive Engineer, PHE a ni a, an member-te chu District Education Officer te, Chief Medical Officer te, Project Director, DRDA te, District Welfare Officer te, President, Sub-Headquarter YMA, MTP, President, MHIP leh a tlukpui District tina mi President MUP tih te a ni a. Chung chu tha taka kan neih avangin Pu Speaker, District Sanitation Board kha din a tul kan ti lova. Tin, tunah hian kan Member zahawm tak sawi ang khan (DEPUTY SPEAKER : Ngawi rawh aw, kan hun a tawp a, chhan zawh tir lawk ang aw). Swaj Bharat Mission hi Central Sorkarin a quideline a siam mek a, chumi quideline

hnuaiah chuan eng angin nge hma an rawn lak dawn tih kan thlir mek a, tuna kan member zahawm tak rawn duh a kha a hming District Sanitation Board ni lovin, District Water & Sanitation Committee, District Level-ah leh Village level-ah pawh kan nei tawh a ni tih kha kan sawi a ni, ka lawm e.

\* Speech not corrected

**DEPUTY SPEAKER** : Awle, thupuan lawk tur a awm a, Member vawiina absent te, a hmaa chawlh lo la tawh kan puan Lt.Col.Z.S.Zuala (Rtd) leh Pu C.Ngunlianchunga te bakah pawimawhna avangin vawiinah hian member 2 Pu Lal Thanzara leh Pu P.C.Lalthanliana te an rawn kal thei lo va, Speaker lamah an rawn dil a, phalsak an ni.

Vawiin hi Zirtawpni, kan dan angin Private Member's Business tih ni a ni a. Private Members' Resolution pakhat chiah kan hmu a. Chu chu member zahawm tak Pu Lalruatkima hnen atangin a ni a. Bulletin Part- II No.54, Ni 10.11.2014 khan inhriattir tawh a ni a. Pu Lalruatkima, member zahawm takin a resolution "India ram hmun hrang hrangah Hmarchhak mite enhran kan ni thin leh chi inthliarna avanga Nunna chan hial kan awm ta leh kut tuar kan awm ta fo mai hi a pawl tak zet a. Hmarchhak mite enhran kan nih thinna tihbona turin Dan tha tak siam turin hmalak ni rawh se" tih chu move turin ilo sawm ang.

**Pu LALRUATKIMA** : Pu Deputy Speaker, ka lawm e. Vawiinah 7<sup>th</sup> Assembly ngaihtuah tur Private Members' Resolution hmasa ber ni bawk, "India ram hmun hrang hrangah Hmarchhak mite enhran kan ni thin leh chi inthliarna avanga nunna chan hial kan awm ta leh kut tuar kan awm ta fo mai hi pawl kan ti tak zet a. Hmarchhak mite enhran kan nih thinna tihbona turin Dan tha tak siam turin hmalak ni rawh se" tih chu he House zahawm taka move thei tura ka awm hi ka lawm tak zet a. Pu Deputy Speaker, kan hriat angin vawiinah hian hmarchhak state 8 mipuite tawrhna, harsatna India ram hmun hrang hranga an tawh mek te lungrual takin tawrhpuin kan sawiho dawn ni te pawhin ka hria a, a lawmawm tak zet zet in ka hria a.

India ram zau takah hian kan hriat angin hnam hrang hrang Aryans te, Dravidians te leh Mongolians thlah te kan cheng za a. Kan hnam leh kan sakhua tih dan te a inan loh avangin harsatnate kan tawh thin a ni. Chumi hre reng chuan kan hnam Pa Pu Mahatma Gandhi chuan India rama hnam hrang hrangte chu inngeih tlang taka khawsa a, pangpar huana pangpar mawi taka a par anga awm kan nih thu te a lo sawi tawh thin a. Chutiang chuan khawvelah hian vun rawng danglam vang te, kan pianhmang leh hmelmang a lo danglam avang tein harsatna nasa tak hnam hrang

hrangin kan lo tawk tawh thin a ni. Chutiang chuan a bik takin Juda ho te leh Negro hote hian an tuar nasa hle mai a. Hemi kawnga sul lo sutute, a bik takin Abraham Lincoln te, Dr.Martin Luther King te leh Dr.Nelson Mandela te kha vawiina hmarchhak mite tawrhna kan han hriat hian an ropuiin an hlutna kan hre zual awm e. Chutiang chuan South Africa ramah pheii chuan hun rei tak chhung mingoin mihang hote awpbetin nasa takin harsatna an tawk a. Chuan an awpbehna tur dan te siamin Apartheid Laws kan han tih ang chi te pawh an hmang ta hial a ni. Chumi dan chu duh lovin nasa takin mihang hoin an bei a. Chu an beihna leh an lungawi lohna avang chuan March 21, 1961-ah lungawi lohna lantirtute kha police-in an kap chiam mai a, mi 69 zetin an nunna hlu tak an chan a ni. South Africa miten an tawrhna chu UNO pawhin lo hriain tawrhpuuin March 21 hi “The International Day for the Elimination of Racial Discrimination” atan a lo hmang a. Tun thlengin khawvel pumah he ni hi hman a lo ni ta a ni. Tin, FIFA Football body lian ber, a khaikhawmtu pawh hian vun rawng danglam vangte leh inthliarna chi hrang hrangte hi a don a duh lo tlat a, khelmual chhungah leh pawnah te pawh he mi a do na te hi a tlangaupui thin a ni.

Chutiang chuan India ramn zalenna a neih atanga kum 60 chuang a liam hnuah pawh hmarchhaka cheng hnam hrang hrangte hian India ram hmun hrang hrangah vun rawng leh kan pianhmang danglam vang te, kan mitmeng leh pianphung leh hmelhmang dan avangin harsatna nasa tak kan tawk thin a ni. Chutihlai chuan kan Mizo nulate ngei pawhin harsatna tawkin an nunna hlu tak an lo chan tawh a nih kha. Tun hnai lawkah pawh hmarchhak mi Arunachal tlangval te pawhin nunna an lo chan tawh bawk a nih kha. Chutiang chuan midang nunna chan leh kut tuar endawng khatiang kha hmuhsit leh chetzia a lantirna ang chi kha nasa takin hmarchhak miten kan tawk a. Chutiang chuan chhah nawmna te hial hmun hrang hrangah inkoh nawmna te kan tawng thin a ni. Hei hian rilru natna te hmarchhak mite chungah nasa takin min siam a, kan hnam inpumkhatna thlengin a tuar thei a ni.

Pu Deputy Speaker, kan House Leader zahawm tak pawh hi hetiang inthliarna, inenhranna racism veitu leh tlangaupuitu langsar berte zing ami niin ka hre nghe nghe a. Kum 2009-a International Water Week Conference Singapore a neihah pawh khan a vei thu leh hemi chungchangah hian a tuar ve ngeitu a nih thute pawh a sawi chhuak hial a ni. Chutiang chuan tunhnai lawk October 18, 2014 North Eastern Region Infrastructure Conclave, 2014 Guwahati a neihah pawh hmarchhak miten kut an tawrh fo thin tihreh a nih theihna turin sorkar laipuiin Anti-Racial law siam ni se a duh thu a sawi media kal tlangin kan hmuin kan hre awm e. Chutiang chuan Pu Deputy Speaker, hmarchhak mite hi Indian anga pawm lohna a awm fo thin a. Chumi avang chuan harsatna chi hrang hrang kan tawk thin a ni. India ram hmun hrang hrangah, ‘khawi ram

atanga lokal nge i nih ? Eng hnam nge i nih ?,’ tih zawhna te hi kan tawk cham chi thin a ni. Thenkhat phei chuan China atang lokal nge i nih tih te, khawchhak khawi ram atanga lokal nge i nih tih te hi zawhna hmun hrang hrangah hian kan tawk thin a. Chutiang chuan Indian kan nih thu kan hrilh pawhin an awih mang hauh lo a ni. Chutiangte chu India zalenna kum 60 zet mai liam hnuah pawh hmarchhak mite hian kan la tawng a ni.

Kan hriat theuh angin hmarchhak state te hi hmasawna kawngah te, kan history avang te leh kan awmna hmun avangtein India ram state dangte aiin kan hnufual a. Hmasawna kawng hrang hrangah kan hnufum em em a ni a. State dangte kan um tang tang a. Khawvel thiamna leh finna, hmasawna kawngah te, state dangah pawh pur kan chawk te a ngai a, zirna tha zawk belin hmun hrang hrangah te kan kal thin a ni. Chutiang chuan raltiang ram kan kai ve theihna turin eizawna kawng hrang hrangah te eizawngin kan vak darh thin a. Chutianga eizawna hrang hranga kan awm darh sarh thinnaah te pawh hian kan khawsakna te a lo dang a, kan ei in duh te a lo dang a, chungah chuan hmuhsitna te, enhranna te, deusawhna te hi kan tawng nasa em em tih kan hre tlang vek awm e. Chuvang chuan hei hian kan hnam inpumkhatna a tichhe thei a. India mi ni lo a inngaihna hial pawh awm palh thei a ni a. Chumiin a kaihnawih lo thleng thei chu inlak hran duhna hial te pawh awm thei a ni. Chuvang chuan hmarchhak mite en hran kan nih thinna tihbona tur leh himna turin Dan tha tak mai kan siam hi kan House Leader zahawm takin a lo sawi fo thin angin a tul tak zet a ni tih hi he House zahawm tak hian kan hriat tlan tha in ka hria a.

Vawiinah hian hmarchhak mite kan tan rual a, mipuite kan himna tura hmalakna tur Dan tha kan neih thuai thuai hi a tul tak zetin ka hria a ni. Vawiina ka resolution hi eptu lam resolution mai a ni lo va. Kan zavaia kan tawrhna te, hmarchhak mite tawrhna te, hmuhsit kan lo nih thinna te, lungrualna zion tlanga leng za a, kan intawrhpuai a, hma la tura ke kan pen hi a tul tak zet zetin ka hria a. Chuvang chuan hemi kawngah hian hmarchhak mite venhimna tur leh himna tur Dan tha duang tura hma kan lakna bul tannaah kan ngaih tlan thain ka hria a. Chumi tur chuan kan member zahawm tak takte pawh ka ngen takmeuh meuh a. Hmarchhak miten kutthlak, enhranna leh hmuhsitna kan tawh fona laka kan himna turin vawiinah hian Pu Deputy Speaker, thui tak sawi ngaiin ka ring lo va, a tuartu te, a hmutute keimahni vek kan ni. North East-a kan kal chuan, hmar chhaka kan awm chuan khatiang kha kan tawk lo. Amaherawhchu, India ram hmun hrang hrangah te khatiang kha kan tawng fo a ni tih kan hre tlang awm e. Chuvang chuan, tunhnaiah pawh media hrang hrangah te kan hmuin, kan hre tlang vek a, thui tak sawi ngaiin ka hre lova. Lungrual taka he House zahawm tak hian hmar chhak miten kan tawrhna te, nunna hial chan kan lo awmna te pawh hi a lo ziaawm theihna turte leh kan himna tura dan tha nei turin lungrual taka kan member pui

zahawm takte pawhin ka resolution hi min pawmpui a, min sawipui turin ka han sawm tak meuh meuh che u a.

Tichuan, Pu Deputy Speaker, a tawp kan hnaih ang a, India ram hmun hrang hrangah India hmar chhak mite enhran kan ni thin leh chi inthliarna avanga nunna chan hial kan lo awm ta leh kut tuar kan awm ta fo mai hi a pawl tak zet a. Hmar chhak mite enhran kan nih thinna tihbona turin dan tha tak siam turin hma lak ni rawh se tih chu kan House zahawm takah hian kan harsatna tawh te hre reng chungin ka resolution hi min support theuh tur leh min pass-pui ngei turin ka member pui zahawm tak tak te leh he House hi ka ngen tak meuh che u a ni e. Ka lawm e.

**DEPUTY SPEAKER** : Awle, tunah chuan resolution kan sawiho ang a, Business dang kan neilo bawk a, member tinte minute 10 inpe ila tha kan ti mai em? Tha kan ti mai maw? Awle, tunge han sawi hmasa ang le? Aw, Dr.K.Beichhua.

**Dr. K. BEICHHUA** : Pu Deputy Speaker, ka lawm e. Vawiina he private resolution tha tak lo lut hi lawmawm ka ti a. Mizoram Assembly-ah chuan thang leh tharte tan ni chhinchhiah tlak tak kan history-ah ni dawnin ka hria a. A hmasain resolution lo chhawpchuaktu kan MLA zahawm tak Pu Ruatkima hnenah lawmthu ka sawi a ni. Tin, vawiinah hian he resolution, helai House zahawm taka member zahawm takten kan sawiho hian north east mipuite chu an lawm ngei ang tih hi ka rin dan a ni. Chutiang chuan, House zahawm taka he kan sawilai mek hian India rama state hrang hranga chengte, mipuite pawh an bengverh ngei ang tih hi ka beiseina a ni.

Pu Deputy Speaker, kan Chief Minister zahawm tak hianin India ram chung leh India ram pawn lamah pawh he racial discrimination hi alo auchhuahpui tawh thin a ni, fakawm ka ti a ni. Chuvang chuan, he kan Chief Minister zahawm takin alo auchhuahpui tawh thu hi helaia member zahawm takte hian tisaa kan chantir hi kan tih tur ani lawm ni tih kha ka ngaihdan a ni, Pu Deputy Speaker. Chutichuan, hei India ram democracy ropui tak mai, khawvelah pawh democracy champion a ni ti ila ti thei tur khawpa ram ropuia cheng kan ni a. Nichina sawi tak ang khan a chhungah chi hrang hrang kan awm a, chutih karah keini north east miten vawiin thlenga hetiang central-a kan Indian pui ten nasa taka min thliar hran hi vawiin independent kan nih hnu kum 60 chuang hnu pawha hetiang a thliar hranna kan la dawn hi a ni thei dawn ami tih hi keima mimalah pawh ka inzawhna thin a ni a. Chuvang chuan, north east mipuite hianin hei hi muthmawh hnarmawh a neih a, vawiin atanga kan fight chhuah loh chuan thangthar lo la awm zel tur kan tu leh



fate tan hian kawng siam lovin kan awm palh ange tihte hi nasa takin ka ngaihtuah a ni. Chuvang chuan, vawiinah hian he resolution tha tak hi member zahawm tak takte hian rilru tak taka kan ngaihtuah ngaiin ka hria a.

Kan thian pakhat Lucknow-ah khuan kum 5 chhung MBBS a zir a, ani tawrh na te ka ngaihtuah hian a rapthlak ka ti a. Hmeichhia a ni a, nitin scooty nen hian class a kal a, a class kalna a hla tham angreng si a. Chutah chuan mihring ang pawh hian min ngai lova, an thil ei ang ang eibang nen hian min vawm tawp zel mai a ni a ti! Dawnfawh te, Balhla te engpawh, chhang te pawh ei se, chutiang chuan nitin nun hi ka hmang a, kum 5 ka tuar chhuak a ni, a ti a ni, a fakawm hlein ka hria. Chulo ah, Pu Deputy Speaker, vawiin kan dinhmun te phei hi chu ngaihtuah ta ila, hmun hrang hrang kan capital Delhi-ah ngei pawh kan North East mipuiten nasa takin tawrhna vawiinah hian an chungah a thleng mek a ni. Bangalore ah te, Mumbai, Pune, Hyderabad, hmun dang dangah te pawh hliam kan tuar a, diriamin kan awm a. Kan chungah thihna hial a thleng a ni tih kan hria, hei hi vawiinah hian kan ngawihpui reng thei dawn em ni, keini hian tih hi member zahawm takte kan zawhna ni se, chutiang chu a ni a. Chutiang anih avang chuan kan Mizo puite leh north east mipuite pawh kan capital Delhi-ah ngei nasa taka protest in kan thalaiten tunhnaiah nasa takin an protest tih pawh kan hriat kha, member-ten kan hre vek a. Chungte anih avang chuan hei hi thil pawl tak a ni. A tlai hma hian keini hian enga ti nge kawng kan siam loh tih hi rilruah lian takin nei ila, tha ka ti a, kan nei theuhin ka ring a.

Hmanni Arunachal tlangval a thihte phei kha chuan India ti ti berah chuan saptawng chanchinbuah te phei chuan lynch of racism tih kha India ram ti ti a nih kha. Chutiang chu a ni a. Chutiang a nih avang chuan vawiinah hian he inthliarna awm mek lai hian keini helai member tam tak te hianin kan fate phaiah kan dah a. Kan rilruah hian kan fate phaia an awm chhung hian kan rilru a ralmuang lova, peaceful feeling kan nei thei lova, chutiang reng reng chuan phaia an awm chhung hian nu leh pate pawh hian kan tuar a ni. Awle, chung zawng zawngte avang chuan Pu Deputy Speaker, he resolution pawimawh tak mai hi kan tu leh fate tana kawng siam tur kan ni tih hriain kan north east pui state dang Assembly-ah te hian he resolution hi an lo sawiho tawh nge an pass tawh nge, an sawiho lo nge, an la pass lo nge ka hre lova, sawiho pass hmasa bertu kan nih phei chuan a ropui dawn hlein ka hria a.

Engpawhnise, he North East pumpui vawiin a kan tawrhna atanga kan fihlim theihna tur a nih chuan vawiina helai House-a member zahawm tak tak te, i ding leh i vei hi inthliarna awmlo se, nimin lamah pawh Bill tha tak tak 4 kan nei a, lungual takin kan zavaiin kan

pass mai a. Chutiang chiah chuan he resolution kan hmalama kan tu leh fate tana kawng kan sialna tur pawimawh tak hi nangni, keini inti lova kan zavaia lungrual taka kan pass theih hram chuan ava han ropuiin, ava han lawmawm dawn em. Chuvang chuan, member zawng zawngin hei hi pawmpui ila i pass teh ang u tih kha ka sawmna che u a ni e, ka lawm e.

\* Speech not corrected

**DEPUTY SPEAKER** : Tunge han sawi ve leh ang? Aw, Pu Vena kha nichin khan a phar a, helam kan ko hmasa a, Pu R.Vanlalvena.

**Pu R. VANLALVENA** : Pu Dy.Speaker, ka lawm e. Kan private resolution hi a lawmawm khawpin ka hria a. Kan resolution hi nichina a move-tuin a rawn sawi ang khan kan House Leader leh kan Chief Minister ni bawh hian a vei em em a, India ram hmun hrang hrangah he thu hi a lo sawi tawh thin a. Kan mover, a move-tu Pu Lalruatkima, kan MLA zahawm tak khan a rawn sawi lang hial a, a lawmawm ka ti a. Kan Chief Minister, kan House Leader zahawmtak ni bawkin a rilru hi a rawn tawmpui hle a ni tih a lang a, chuvangin he resolution hi kan ram kan hnam hian a mamawh a, kan ram kan hnam humhalhna tur, kan induhsakna tur ni tak zet zet hian ka hria a, a lawmawm khawpin ka hria a ni.

Nichina an rawn sawi ang khan he House ah hian inenhranna a awm lo kan tih tawh kha. Keini lam pawh hian tiang kha kan rilru ni tlangin ka hria a. Amaherawhchu, he lai a tawp tlar hnih emaw lek hi tlem hi siam danglam hret hi a rem thei lawm maw ni aw, ka ti a. Kan resolution neitu zahawm tak hian rem a tih chuan, Hmarchhak mite enhran kan nih thinna tihbona turin Dan tha tak siam turin hmalak ni se, han tih lai te kha, kan India ram state khawi hmunah mah hian mite va tihnat emaw, va hmusit emaw phalna hi a awm hi ka ring lo a, keimahni ram leh hnam, Mizoram leh hnam hi kan inhumhalh a, kan inhmangaih tawn a, kan inngaihsak a ni tih kan lantir hian, hnam dangte pawhin min zah mai theih ka ring a. Chuvangin, Pu Deputy Speaker, Hmarchhak mite enhran kan nih thinna tihbona turin, Dan tha tak siam turin, hmalak ni se tih aiah khan, Hmarchhak mite inenhranna hi khawiah mah awm tawh lo se tha kan ti, tih zawng khan, her danglam hret kan resolution neitu khan a remtih chuan kan hnam zahawmna tur a keng zawk ang em ka ti a. Tin, hmun danga Dan siam rawt leh Dan siam tura hma han lak kha hlawhtlin a harsat zawk deuh hlek ka rin avangin kan zahawmna tur leh keimahni kan inhmangaih a, kan inenhrang lo a, Mizo hnamte kan inlainat a ni tih lantir nan a tha zawk ang em tih rawtna ka rawn siam a, rem in tih theih chuan. Tikhan kan resolution kha keimahni Mizo hnam inhumhalhna te, inhmangaihna te, inpumkhat nate leh invenhimna te kengtu zawk a nih ka ring a ni. Ka rawtna hi kan chhiar nawn leh chhin ang a,

Hmarchhak mite inenhranna leh kut thlakna hi tun hnuah thleng tawh ngai lo se kan ti, tiin thlak ta ila a rem thei em? Pu Deputy Speaker, Ka lawm e.

**DEPUTY SPEAKER** : Pu T.T. Zothansanga khan sawi se, a dawtah Pu Chalrosanga.

**Pu T.T. ZOTHANSANGA** : Pu Deputy Speaker ka lawm e. A move tu khan a rawn move thiam khawp mai a, a lawmawm a, Tlawng an vaw te te a, Mat te kha an dap dawn ni khan kan hria a, amaherawhchu a rawn thui khawm tha leh viau mai a, a rawn move tu hrim hrim hi a ngaihsanawm ka ti a. An Party inthlanah pawh hian O.B tura ka lo hual leh ni tura an sawi te zinga mi a ni a, a ni leh ta rih lo a, vawiinah hian resolution tha deuh mai a rawn tilang a. Kum 2007 ah India leh Burma inkar ram ri hi hung vek ni rawh se, ti a MNF resolution ai te kha chuan nuam tak a ni. Khang te kha khawchhak mite nena inkalpawh hlau ngawih ngawih a an resolution te kha tun thleng hian file-ah a la tlu mai mai a ni.

Resolution hi kan han ti thin a, niminah te pawh khan kan han sawi a, 2010 a in resolution te pawh kha in la bawhzui lo, an han ti a. Tin, 2007 a resolution te kan ngaihtuah kan ngaihtuaha, resolution hi a ropui a a hlut viau rual hian a tak hi a te thei mang e aw, rilruah chuan ka ti a. Tin, tunah hianin India ramah hian North East mite hi enhran kan ni e, kan tih lai mek hian, hei hi tun hnaia thil thleng a ni tih kha ka sawi duh a. Hei a resolution puluttute hian kum 10 ro an rel a, chutih lai chuan Central-ah Congress-in ro kan rel a ni. Central a Congress kan lal chhung zawng khan inenhranna ri va hi Assembly ah a ri ngai lo, chuangin tunah kan opposition hotuten thla khat dawn dawn hmuh an tum, an hmuh theih loh a te khu, in enhranna rawn tichhuaktute hi an ni. Chuvangchuan, Central lamah her rem dik chi niin ka hria a.

Enhran kan nihna langsar tak mai pakhat chu Chinese hotupa India ramah, Gujarat ah alo kal a, khulai a North East mite awm apiang mai kha an lo dah bo vek mai a, North East mi pakhat mah kha kha Chinese hotupa khan hmulo se an duhna vangin hmun himah an lo dah sawn vek a, khata tang khan he inen hranna hi a intan niin kan hria a. Chuvangchuan, he inenhranna kan han tih kan han tih pawh hi kumina sawrkar thar Central-a a awm atangin niin ka hria a, chuta tang chuan mipuite hian tunge hlauh tur, tu te hi nge kan ram leh hnam tana himlo tih hi an lo ngaihtuah kha a tha ve phawtin ka hria.

Tin, Pu Deputy Speaker, thalai hman tak tak kan awm a, ka rilruah chuan Hotel pakhata duty mai lo hianin ‘Timurthiah hian party thenkhat thalai hi an zuk duty mai thei lawm ni aw, ka ti a, helai atanga kan siamthat theih loh thil tam tak hi karawn sawi a ni a. Tin, ka rilruah chuan Mizoram chhiat leh that thuah hian MNF te hian,’ ‘Pathian leh kan ram tan’ tiin hman atangin theih tawp an chhuah a, beihna hrang hrangin an bei a, mipuite pawhin kan support thin a ni. Tichuan Mizoram thatna leh hmasawna turte rel fel turin hun zalen tak neiin inremna kanrawn chuang chhuak a, khalai inremna kanrawn chuan chhuah lai karah khan engati nge Mizoram hnam din khawchhuahna tur leh hetiang ang hi engati nge MoU ah khan an lo telh loh aw, tih hi ka rilruah hian arawn lut tel a ni. MoU ah khan lo lut ni se chuan, a dik tak chuan MNF pawh dik takah kan movement tirah khan Hmarchhak mite hi enhran kan ni tih kha alo awm daih tawh a, hemi an sawinaah chuan, khalai enhranna kan nihna hrereng chung MoU ah anrawn telh lo ringawt pawh kha si an phur deuh chuan kei chuan ka hria a ni.

Hei chhaih nawmna kan tawknasa a ti a, helai te pawh hi thil tam tak hmarchhak mite hmusita kan awmna ni a kan hriatte hi chu kan nungchang eng emawin a zir loh chin te hi chu a awm ve thei tho hian ka hria a, a racial tak tak vekah hian kan zuk khung lut vek ringawt a. Amaherawhchu, a racial piah lamah hian mimal nun thlahdah leh eng emaw deuh, thil tam tak te hi chu a awm lawm maw ni aw? ka ti a. Tin, inlakhran duhna te pawh a awm thei, ti khan arawn sawi a. Inlakhran duhna awm theih kha a hlau khawp a, kha thil MNF Party atangarawn awm kha a lawmawm ka ti khawp mai. A chhan chu an party president ber khan, ‘Kan inremna hi a tawp, final ala nilo, zalen kan sualna chapter hi kan la close lo,’ a ti khalh khalh thin a. Kha zalen an sualna an la close lo a kha tuna hetia Dan anga anrawn rawt takah chuan an final-na, anrawn close ta dawn em ni tih ka ngaihtuahnaah arawn awm a, a lawmawm hi ka ti ve hrim hrim a ni.

Tin, a resolution hrim hrim hi a tluang a, ngaihtlak pawh a nuam a, amaherawhchu ka’n ti deuh hram teh ang, KTP a kan awm lai chuan a phur deuh ten tawngtai tlaivar hi anrawn rawt thin a, lo oppose hi a har em em a, mahse a tukah chuan enge a rah chhuah tur mai hi hriat awm tawh thin silo a, pawm lo chung chung hian kan pawm leh mai thin a, khatiang resolution kha a angin ka hria a, pawm loh theih loh ni si, han pawm dawn a, eng ang taka function nge ni a hlawk tur nge tih kha a hriat theih silo, khatiang resolution te pawh kha a ang deuh em aw tih kha ka rilruah chuan arawn awm a. Chuvangin nichinah kan member pakhat Pu Vena khan mumal taka a rawtna te pawh kha a thain ka hria a.

Tin, India ramah hian Dan hi kan nei tha angreng khawp mai a, kan Dan pangai te hi chipchiarin kan la enkim lo te pawh a ni mai thei. Tribal te kan him theihna tur ruahmanna fel tak tak kan nei a ni. Entirnan, kan Dan siamtu Dr. Ambedkar te pawh kha hnam hnuaihnung a ni a, khamiin a hmuh hmaih bak leh kan tlangmite leh hnam hnuaihnungte kan himna tur ang chi reng reng hi constitutional amendment-ah hian telh chhoh mek zel a ni a, chuvangin India ram Dan hi a tha tawh khawp a ni.

Pu Speaker, tuna resolution an rawn rawtna ang hian ti dawn pawh ni ila State pakhatina tih chi pawh a ni lova, India hmarchhak ho in kan himna tura a huhova tih tlan chi a ni a, hei hi chu inbiak rawnna zau tak neia tih ho chiah ka ngai a ni. State dan nge Central dan? Central dan a nih chuan Parliament thu te pawh a lo ni ang a, state kaihhnawih tur a nih chuan concurent list te pawh a lo ni ang a, khatiang tak khan ngaihtuah tur te a awm a ni. Kan fimkhurna atang hian a resolution-ah hian tlem tihdanglam kha Pu Vena'n a rawn rawt ang kha tha ka ti a, kan him lohna tam tak hi kan inenfiah ve hrim hrim hi a tha ka ti a ni.

Entirnan, thenkhatin harsatna an tawh khu chu anmahni lepchiah avanga harsatna an neih ve fo khu a ni. Amaherawhchu, a racial a nih tak tak phei hi chuan Mizo thinlungah hian a engmah hma hian kan tang nghal auh vek a ni. Kha kha chu kan vaiin inphatsan chi a ni lova, he racial discrimination hi a awm tak tak a nih chuan tu te mah hi kan ral bang thiang lo va, kan tih vek tur a ni. Chuvangin, he resolution hi a nihna ang ngau ngaua pawm hi chu a result hi a hriat sa tho va, chuvang chuan hetiang ngau ngau lo deuh hian a Dan hranpa siam kher loin hmarchhak mite inenhranna hi khawiah mah awm tawh lo se kan ti tih ang vel tal khan pass ila a thain ka hria. Pu Deputy Speaker, ka lawm e.

**Pu CHALROSANGA** : Pu Deputy Speaker, ka lawm e. Private member's resolution tha tak niin ka hria a, keini pawh Delhi-ah lehkha zirin kan awm thin a, north east mi kan nihna ang pawh hian harsatna kan tawh a, state dang mite pawhin "chinky" tih te pawhin min ko thin a ni, engemaw chenah chuan a huatthlala em em a, engemaw kawnga a that ve lehna chu kungfu thiam emaw min ti a, north east lam hi chu min rag ngam ve miah lo va engemaw zawngah chuan a tha ve riau mai a ni.

Vawiinah kan member pui Pu Lalruatkima'n resolution a rawn putlul hi a tha a, hmarchhak mite state dangah a bik takin Delhi tlangah te chuan nasa takin inenhranna kan tawh mek a ni a. Hei hi kei pawh ka sawi tawh ang khan lo tawng ve tawh thin ka

ni a. Amaherawhchu, ka member puiten an rawn sawi ang khan a resolution hi a that rualin a tawp ber a line hi hmarchhak mite enhran thinna tihbona tura Dan tha tak siam turin tih hi tibo ila, 'hmarchhak mite enhran tihbona turin hmalak ni rawh se,' tihah hian he resolution hi pass thei ta ila a tha awm mange ka ti a. A chhan chu Delhi hian tunah hian ka hriat soal loh chuan North East help line cell te pawh hi an din tawhin ka hria a. Ka hriat soal loh chuan chutah chuan nodal officer te khumi enkawltu tur hian IPS Officer an ruat nghe nghe niin ka hria a, chu chu Jt. Commissioner rank niin ka hria a ni. Chutiangte chu a nih chuan state dangah te pawh hian, wawiinah hian he resolution kan lak hi a dan ang siam ni lovin inenhranna kan tihbo theihna tur hian hmalak ni rawh se kan tihah hian hetiang help line hrang hrangte grievance cell North East mite tana hawng tur hian state hrang hrangte pawh hi han ngenin awareness programme te Cultural exchange te pawh hi nei ta ila ava tha awm em tihna rilru te ka nei a. Pu T.T. Zothansanga rawn sawi ang khan kan danah te hian hetiang inenhranna chungchangah pawh Dan tha tak tak mai a awm tih a rawn sawi tawh a, churang chuan ka ngaihdan chuan resolution rawn puluttu hian ngaihtuahna thui tak han hmang leh se, he resolution hi lungruak taka kan pass theihna tur chuan Dan tha tak siam tur nilovin inenhranna a bonan hmalak ni rawh se ti hian resolution hi awm ta ang se a va tha zawk awm em tih hi Pu Deputy Speaker, tawi tein ka rawn sawi ve a ni e, ka lawm e.

**Pu LALSAWTA, MINISTER** : Pu Deputy Speaker, ka lawm e. Pu Lalruatkima'n keini chauh nilo Naga te, Khasi te, ensan kan nih chungchang a rawn tar chhuak a, kan vei tlang vek a, a lawmawm ka ti khawp mai. He thil hi a hun lai chuan a tuartu kan ni deuh vek ang a. Chubakah kan Chief Minister zahawm takin 2009-a Singapore-a a han sawi rik ang deuh khan rilru tina tur hian engemaw chang chuan kan hmel hmang leh kan pian dan avangin kan chungah thil a thleng fo a ni a. Tunhma deuh pheikha chuan hetiang hi a nasa leh zual a, kan ngaihtuah ngai lo pawh a ni mai thei a. Migo kan tih ten khawvel an pum hmawm deuh lai rawn chhuh sak a Bruce Leea'n a Kungfu hmanga khawvel a rawn hneh chhoh hian keini ang Mongolian chauh hi khawvelah hian min ngaihdan a danglam nasa tawh em em a ni. Hei hian thui tak mai khawvel history pawh a tidanglam a, tunah pawh a la awm reng a ni, hei hi kan vei tlang a.

Tin, kan Chief Minister zahawm tak kaihhruaina hnuaiah hian thil tha chu a tha tih hi kan ngaihdan tawp a nih avangin opposition thlirna tihdanglama khu laiah min en hrang tih tawh nak alaia helai keini opposition leh ruling han intihhran pheikha chu kan

ngaihndan hi a ni lo hrim hrim a. Chuvangin vawiin resolution pawh hi kan en hrang miah lo va, resolution hi tha kan ti a. Ama'rawhchu, Law Minister ka nihna hian ka ngaihtuah thin a, a tawp hmawrbawkna lai tak hi he House zahawm tak hian pass ta ila, Law Department chungah a tla dawnin ka hria a. Chutah chuan 'Dan siam ni rawh se' pawh ni satliah lo 'Dan tha tak' han siam kha a huphurh awm dawnin ka hre khawp mai a. Keini ni lovin, Central lampangah Dan siam turin kan ti dawn te a nih chuan rawtna-te pawh kan siam thei ang a. Mizoram atanga siam a keimahni, helai kan competence chin leh kan limit chin ngaihtuah kha chuan Mizoram atanga kan siam kha a ngai dawn si a. Kan siam chuan kan thunun theih chin chu keimahni kan ni mai a. Hnam dangten min vaw lo tur a ni, min beng lo tur a ni, kut min thlak tur a ni lo tih kha chu India ramah IPC te awmin kawng dang dangin India citizen chauh ni lovin, kawng dang dangin kut thlak chungchangah chuan min lo humhalh tawh si a. Mahse, an tih tlat si kha chuan, buaithlakna lai tak pawh kha a ni a. Chuvang chuan, a humhalhna tur leh helaia a rawn duh tak mai, Hmarchhak mite enhran kan nih thinna tihbo-na turin hma lak ni rawh se tih hi House zahawmtakah hian han pass ta ilangin, Law lamin emaw Dan han siam dawn ta ila, kan Bar Association-te leh kan mithiamte nen han insawmkhawmin kan Law Commission nen han Committee rup rup thin mah ilangin, a tawp kan kharna tura ka rin chu, engatinge maw hetiang Resolution hi in lo tih mai chu aw min ti palh ang tih ka hlau a. Tin, mipui mitmei pawh ven a na duh khawp ang a. Resolution pass a nih tawh si chuan mawhphurhna-in a bawhzui lo thei lova. Chuta mawhphur ve ni a ka inhriat avangin helai hi han sawilan loh theih lohah ka ngai a.

America a independent tirh khan an Assembly-ah, Philadelphia-ah May atanga September thleng mai an han Committee-a, an han sawi laih laih lai khan State kalkhawm tur, Federating Units ho khan khumi a Federal Government an tih khu a lian ang tih an hlau lutuk a, thuneihna kha states ten neih zui zel a, tuna an awm ang khu khanglai khan an lo hmuh phak avangin an duh tlat a. Chuvang chuan, Federal Government hi chuan sipai 3000 bak a nei tur a ni lo tih kha Resolution an rawn pulut a. An Chairman kha George Washington-a ni a. Ani khan a ti thiam angreng a. Chutiang Resolution an rawn putluh chuan ram dangin sipai 3000 aia tamin America hi an run tur a ni lo ti law law ila a ti a. Nuihza siam nan an hmang ta mai mai a. Kan va thunun phak loh, kan va thunun theih loh tur chungchangah te khan Dan kan siam mai palh ang tih te kha a hlauhawm deuh avang leh a Dan siam lai hrim hrim hi helai kan State Legislature Competence atanga ka'n ngaihtuah hian ka huphurh a. Chuvang chuan, hengte chu tih mai tur a lawm ti a member zahawmtak tak leh thiam tak tak ten in rawn rawtchhuah kha chuan, chungte pawh chuan min la rawn kaihrui thei turah ka ngai a. Mahse, hetia ka'n ngaihtuah mai hi chuan

Dan tha tak mai han siam tur lai kha thil huphurhawm tak niin ka hria a. Kha kha sawi hmasak tulin ka hre tlat mai a.

Amendment te pawh kan han sawi a, kan member zahawmtak takten Amendment hi tih mai theih ni ta se an han ti a. Mahse, kan Rules of Procedure te kan han en hi chuan, Rules 129 te, 130-na te chuan a member ten hetiangamendment an siam duh a nih chuan, a hma aiin an siam duh dan kha rawtna ziakin an thehlut ang a. A copy pawh Private Resolution neitu hnenah khan an pe ang tih te a ni a, khang kha kan lo ti lo zo tawh a. Helai sawi hunah hian kan han ti a, Amendment hi tihhret nise a tha ang a kan ti a, rawtna tha tak tak te a rawn piang chu a ni ta mai a.

Pu Speaker, kan Dan 129 leh 130 hi a khawng lutuk deuh em? He House-a member-ten uluk deuha kan ngaihtuah a, mipui thlankhawmten kan lungrual theihna hi chu amendment angah hi chuan han tih mai theih chu ni se a tha a. Mahse, mumal taka Session kan neih tumah hian kan Dan bawhchhiat atanga kan tan kha ka ui ve deuh bawk si a. Chuvang chuan, amendment han tih dawn chuan Dan ang chuan kan ti thei tawh lo, kan bawhchhiat a ngai. Bawhchhia ang ti a lungrual taka kan ti a nih chuan, he House member-te kha kan nalh lo lutuk ve thei a. Tin, he House zahawmna kha kan tibawrhbang thei tho bawk a. A nih ang angin pass ang han tih dawn lah khan, ka sawi tawh ang khan a mawhphurtute kan lo ni zui dawn a nih chuan ka huphurh khawp mai a. Dan tha tak mai han siam tur lai kha a huphurh awmin ka hre bawk si a. Chuvang chuan khalai thil pahnih kha ka'n sawi a.

**Pu R. LALRINAWMA (DEPUTY SPEAKER)** : Pu Speaker, ka'n sawi ve lawk. Hei kan Dan 130-naah hian Amendment a rawn move kha member ten an object thei a. Mahse, kha kha Speaker-in i discretion-in Amendment kha i phalsak thei a ni. Amendment and such objections shall prevails unless the Speaker allows, an rawn object ang a. Mahse, i discretion-in Amendment kha move i phalsak thei a ni tih kha ka'n sawi duh a.

**SPEAKER** : A resolution neitu pawh kha kan la zawt rih lova. Tichuan, nakinah a resolution neitu kha kan zawt ang a. A remtih chuan Amendment kha a lo chhuak ang.

**Pu LALSAWTA, MINISTER** : Pu Speaker, a dik a. Mahse, 129-na kan chhiar khan, 129-naah khan ziaka tih tur, tin, one clear day a pek tur tih lai kha a ni a. Kha Amendment kha heta Amendment anga a lo luh tawh hnu-ah an object chuan tih a ni chauh zawk a ni. A Amendment dan leh a kalhmang, a procedure kha chu one clear day kha a la ni tlatin ka hria Pu



Speaker. Chuvang chuan, kan Resolution hi withdraw mai thei ta sela chuan, kan sawi tawh angin kan House Leader hruainaah hian tumah inthliar lovin, kan inpui zel thei bawka, remchang dangah kan la ngaihtuah thei mai lawm ni tih kha Pu Speaker, ka rawn sawi a ni e. Ka lawm e.

**SPEAKER** : Home Minister Pu Zira kha nichin khan a phar tawh a, i ko hmasa ang u.

**Pu R.LALZIRLIANA, MINISTER** : Pu Speaker, ka lawm e. Wawin hian resolution han en thuak chuan tha tak, ama'rawhchu, ngaihtuah chian zawka harsatna awm leh Dan tha tak IPC hnuaiyah kan lo neih tawh te a awm a. Dan hi eng ang pawhin pass ila, rangkachak pawhin zia ila, a kengkawhtuten kan kengkawh phak lohna Dan te keinin siam ngawt ila awmzia a awm hranpa chuang lova. Chuvangin, tuna kan han pass hian, House-ah meuh pass tawh a, awmze neilo tur deuhthaw hian kan member-te hian an sawiin ka hria a. Chuvang chuan, hemi amendment dan kawng a awm loh phei chuan, he Resolution hi tluang taka kalpui chu a har mai awm mang e tih chu kei pawhin ka ngaihdan a ni a. Hetiang hnam inhumhalhna leh inpumkhatna te, India rama a main stream a kan luan luh ve dawn a, khulama min object-tu lek lek anga awm a, min recognize duh lo tlattute an awm hi kan buaina a ni a, kan harsatna. Mipui an tam em lah tak a, duh angin Delhi sorkar emaw, hmun dang ami te pawhin an duh angin thil an ti thei bik lo a ni mai a. An duhthusam te chu ni sela, hetiang inenhranna hi awm lo turah beisei ta ila. Ama'rawhchu, chutiang a nih lai chuan kan pianzia-te leh hetiang kan awmdan-ah ringawt hian foreigner emaw min ti hi a tam em em a, tun hma pawhin a tam lehzual a. Tunah hi chuan tlema han hriat pawh ve deuh te pawh kan han ni zawka. Tun hma te phei chuan en hranna hi a nasa em em a ni.

Tunah chuan Zofate hmun hrang hrangah kan inzarpharh a, kan tam ve tawh bawka a. Chutiang a nih lai chuan harsatna kan tawka thin. Inenhranna te, inhmuhstinate, inthamlohnate wawin tam tak keimahni Mizoram atang chauh nilovin Arunachal atang te, Manipur atang te, hmun dang dang atangtein kan tawka tawh thin a ni tih kan hria a. Thihna hial te pawh kan tawka tawh a. Hengte avang hian kan hotupa, kan Chief Minister zahawm tak hi a chhuanawm hlein ka hria a. Nichinah kan ngaihthla tawh a, Singapore-a kum 2009-a a han kal pawh khan International Water Week hmang turin Singapore Sorkar-in an sawm a ni a. Heta a thusawi hi India ram pawh a nghawr laih reng a, India ramah chuan hmel leh ruangamin a zir loh avanga India-a inpawm lohna a nasa a. Keini te pawh hi 'Indian' i ang lo min ti an tam thin a ni. Thil vanduaithlak tak a ni a, Indian chuan eng ang hmel nge a put tih te pawhin ka zawka thin a,' a ti a. Hetiang rilru tha lo an put avang hian alawm India

ramah inpumkhatna a that theih loh, helna a tam viau te a ti thin a ni a ti. India zu intih ve naklaia khawilam mi nge in nih min han tih thin te hi India mi, Mizoram mi ka ni ti pawhin Mizoram chu khawiah nge a awm tih pawh an hre lo, Burma nge Bangladesh-ah an han ti phehi hi chu a thinur thu te pawh kha hmaah khan a han sawi chhuak a.

Passport chungchangah te pawh hian, khawnge i passport, India rama kal rau rauah te pawh khawnge i passport, tia indil thin thu te pawh a sawi a. Chutiang a nih avang chuan Singapore atanga alo haw thlak pawh khan helai India mite chuan an lo ngaihven hle mai a. Mi tam tak, Chanchinbumite, T.V. miten zan dar 1:30 thlengin Airport-ah an lo nghak a. A thusawi kha a ti tak tak nge ni tih te an lo zawt a, ‘Singapore-a ka thusawi kha, khatiang ang chiah kha ka ngaihdan a ni, kha thu kha thu dik a ni,’ tiin a sawi leh mai a ni. Hnam anga kan dinnaah hi chuan kan hotupa tluka chhuanawm hi an awm lovin ka hria a. Hei lo pawh hi India ram hmun hrang hrangah a thusawi hi sawichuah tur a tam a. Chuvangin, North East mite hi chuan an thlamuanpui hle a ni tih vawiinah hian ka’n sawi duh a ni he resolution behchhan hian. Thla hlui lamah pawh khan Guwahati-ah chanchinbumiten an lo zawt a. Heng hi India ram hmun hrang hrangah kutthlak kan nih a kan tawrh thin dante, a lungawi thlakloh ziate chanchinbu mite hmaah huaisen takin a zui sawi leh nghe nghe a ni.

Hmarchhak mite inenhran hi vanduaithlak kan ti a, he thil hi thleng tawh lo se tha a tih thu kha a lo zu sawi daih tawh a. Vawiinah hmangchang hre takin kan thianpa Pu Ruatkima’n resolution a rawn putlul hi tha tawkin langlo deuh mahse, eng eng emaw han tihthat a, kan siam that hram theih chuan pass pui pawh chu a that ka ring a. Hetianga India ram, a main stream-ah luan luh kan tum tawh a, sut leh rual lohva nghet a India-a intulut tawh te, kan hotute lamin hetiang an rawn ti te pawh hi a lawmawm ka ti a. Kan inpumkhatna hi tha telh telh turah kan ngai a ni.

Pu Speaker, hetia kan din takah chuan keimahni family chanchin thu hi T.V.ah te, chanchinbuah te nasa takin a lo lang a, helai House zahawm takah hian han sawi ve zawk ka duh a. Chutih lai chuan MNF thalaiten Ni 12-a an thusawiah hian i phalnain ka’n chhiar ang a. “Hetih lai mek hian November ni 12 zan khan Home Minister fapa R. Zothansanga leh a thiante Aizawl Hotel Royal chhunga buaina an chawhchhuah dan News-a tarlan a nih avangin Hotel Royal hi an rikrap zui a, Hotel Royal Gate chu nasa taka chhut rik bur bur a ni a. A bul a miten an lo hriatin an tlan darh leh ta a. He thil hi finfiahna tak

awmlo mahse, Home Minister fapate thil tih ni ngeia hriain mita hmutute chuan an ngai a ni” tih arawn sawi a. Ni 13-a MNF Thalaite Press Release kha a ni a. Hetiang finfiahna awm reng reng lo, kan fate hi an chhuak tawh lo hrim hrim a. Finfiahna awm reng reng lo T.V.ah te, chanchinbuah te kan la chhuah duh zel hi chu kan inzir chian a ngai hlein ka hria a. He thilah hian ka fate ka tan hauh lova, tlangval an ni a, zu te pawh an lo in ve a ni thei e. Amaherawhchu, thu takah hian inbei ila, insawisel ila ka duh a. Bollero, Police motor ka kawl kha an ru chhuak reng reng lova, Armed Veng Cricket Club-ten Suaka Cricket Club Sihhmuiah tournament an neihnaah hman min dil a. Ka phalna thlapa ka pek a ni a. Amaherawhchu, zu in pui nan te an lo hmang a nih chuan ka hriat phak tawh loh a ni. VIP light an chhi lo bawk a, tichuan, Police-in an mannaah khan ka fate an nih avanga case pawh siam sak lo an ni reng reng lo va. Hotel neitunu pawh hian minrawn phone a, ‘i fapa a lo ni reng mai a, a lo telve reng mai a, pawika ti khawp a,’ a ti a. ‘Pawika ti reng reng suh, Dan angin thil tvisual an nih chuan rorelna hnuaiyah kan inangkhat vek a ni, Police ten an chungah ro an rel tur a ni,’ ka ti a. Police lamah pawh an O.C. ten minrawn bia a, chutiang bawk chuan ka fapa a telve avang khan midang in tih ang bak khan engmah lo ti suh u, ka ti a. Lock up-ah an awm a. Home Minister fapa a ni tih kha vawikhatmah a sawi lova, a sawiloh piah lamah, ‘tunge i pa? an ti a Police ten. A pa a sawi duh lova, “Pa i nei tawh lo em ni” an ti a, a nu hming chiah a ni a sawi ni. Chuvangin, thu tak chanve inbeih vak vak mai hi a pawika ti a. Helaiyah hian an thiamlohna a lo awm a nih chuan Zoram mipuite hnenah ngaihdam ka dil a.

Lock Up-a an awm chhungin mi tam tak kawrlumte an pe a, mahse ka fate chu pek an phal lova. Khilalaia Police duty hmeichhia-in ‘vawt an ti lo’ a tih tlat avangin. A unauten an khawngaih a pek an tum pawhin pek an lo phallo va. Chutiang chu a ni a. Mipakhat, Police duty pakhat pheichu Lock Up-ah a va lut a, khawngge Home Minister fapa chu, Home Minister hi engmah a nilo, helaiyah hian Home Minister an awm lo, ti hialin challenge takin a va ti zawk a ni.

Chuvangin, ka fate an nih avangin case siam sak loh an ni lova. An thil tih kha Police ten a tawkin ro an rel a ni tih ka sawi duh a. Ka fate hi ka chhan ngai lova, kum 2003-ah pawh khan ka fapate khawlaiah Car Tape an lo play ring deuh a, khawlaiah Police ten an lo man a, Bawngkawn Thana-ah an dah a. Midangin minrawn hrilh a, “I va la chhuak dawn lawm ni” minrawn ti a. Ka hre duhlo reng reng, midang tana hnawksak an nih chuan an tawrh tur chu an tuar mai tur a ni ka ti a. Zan khuain Lock Up-ah an awm a, a

tuk dar 3-ah chauh Court-ah an kal a, chutiang chuan Court-in an rawn chhuah leh a ni. Chutiang chu thil dik tak zawk a ni a. Pu Speaker, vawiinah hian fate hi kan control zo lova. Chanchinbuah ‘mahni in chhung pawh awplum zo lo, mahni fate pawh control thei lo, Home Minister atangin bang rawh se,’ an han ti te hi ka hrethiam em em a ni. Kei chu ka tling lo a ni. Kan inchhungah pawh kan inchhung enkawl turin ka tling lo tih ka hria. Home Minister ni tur pawh hian ka tlin em avanga awm ka ni lo tih ka hria. Chuvangin, vawiinah hian ka tlin lohna zawng zawngah Zoram mipuite min tawngtaisak turin, ram venhimnaah a ni emaw, khawpui tihthianghlimnaah emaw tan kan lak theih zawkna tura finna kan neih theih nan min tawngtaisak zawk turin mipuite ka sawm a ni. Ka lawm e.

**SPEAKER** : Mahni fa enkawl thei lo kan awm khawm a ni deuh ber zawk a ni, tunlai khawvelah hian. Leader of the House khan sawi tur a neiin ka hria, midang kha lo ngawi rih rawh u, khawngaihni.

**Pu LAL THANHAWLA, CHIEF MINISTER** : Pu Speaker, programme loh theih loh ka nei a, paw ka ti a, i phalnain ka chhuah a ngai dawn a. Min nghah tlat avangin dar 10:30 ami tur kha dar 1:00 ah an pawhfan tak avangin, awm ka duh baw si a. Chuvangin, ka din hmasak a tul ta tlat a.

Pu Speaker, he Resolution hi resolution tha tak a ni a, keini lam pawh hian kan welcome vek a ni. Hetianga min tihkhalhna chang a hria hi a bengvar khawp mai, a tuan a rang a. Kan tih ngei ngei tura tih kha min lo tihkhalh tlat mai a. Hmingthat lak tur a awm a nih pawhin hei min lak khalh dawn ta a. Nimahsela, a lawmawm a, ram leh hnam thil tak tak a ni a.

Mizo nationalism hi Pu Speaker, hmuia awm a ni lova thinlung lampang zawk a ni a. Hmuia nationalist hi chu kan tam mai a, thinlung lama a tak taka ti hi kan tam tehchiam lo emaw ni aw tih te ka ngaihtuah thin a. Vawiinah helaia ziaka an rawn lan tir hi a tha ka ti, a lawmawm ka ti. India ramah hian keini hnar bawng deuh, biang ki ruh sang deuh, pianhmang pawh danglam deuh kan nih avang hian inendawngna hi a tam em em a ni. Hei hi thil bawlhhlawk tak, thil tenawm tak a ni a. Ka kalna apiangah Bombay-ah pawh ni se, khawiah pawh ni se, AICC meeting ah te pawh hian vawi tam tak ka sawi tawh a. Kan hotu thenkhat phe chu, “National leader in tlin loh zia hi inngaihtuah teh u, vawiinah hian India map pe che u ilangin Mizoram hi khawiah nge a awm tiin zawt ta che u ila kaw thei lo in tam ka ring. Chuvangin, in ngaihtuahna hi in tihdanglam a ngai, India ramah National Integrity te in ti a, chu lam hawi zawng chuan in kal si lo,” tiin ka sawi

ve fo thin a. Tin, ka sawi dan tam ber pakhat phe chu, “Hei committee hrang hrangah te kan awm ve a, sports thleng hian discrimination in nei a. Heng zawng zawng avang hian India hmarchhakah chuan helna, inlakhran duhna te pawh hi a tam a ni. Integrity in duh tak tak a nih chuan kan rawt thin ang te leh chutiang khatiing chu ni sela kan tih thin ang te in pawm a ngai a, mahse in ti thei si lo. Entirnan, Deva Gowda hunlaiah Shukla Commission an din a, chu chuan recommendation tha deuh deuh a pe a, a siam a. Mahse UPA te an lo sorkar leh a khawiah emaw a file kha vaivutin a bawm mai mai a. Chutiang chuan, Vision 2020 te kan dinchhuak a, tunah hian khawiah nge a awm tak hria pawh a titu turte zingah hian in awm pawh ka ring lo ve,” tiin hmanni lawka DoNER Minister Dr. Jitendra Singh-an Guwahati-a a kohah pawh khan ka sawi bakah ziakin kan sem nghe nghe a.

Chuvangin he Resolution hi Resolution tha tak a ni a. Tin, House-a pass hmasa ber kan nih phe chu chuan thil tha tak tur a ni a. Amaherawhchu, bawhzui nuam deuh taka resolution hi kan siam a ngai tlat a. Chulai te chu a ni a, lo sawiho pheh ila chuan sawiho vak ngai lova pass mai theih awm chi a ni a. Hei kan hotute Assembly an nei a, an lan ve loh pheh chuan an challan loh phah ang tih te pawh a hlauhawm a. Chuvangin, an kal thuai ve thlap theihna turin pass thuai a tha a. Mahse, tuna a nih ang hi chuan bawhzui tur tan pawh a harsa ang tih ka hlau a. Siamthat dan an han rawt kha a pawimawh hlein ka hria a.

Tunah hian ben harh an ngai a. Kan resolution ah pawh khan hmanni lawka Arunachala tlangval thi ta te leh kan Mizo nula ngei pawh Delhi-a an thah te kan sunna leh kan tuarpuina te pawh tel ta ang se. Tin, Bangalore-ah te, hmun dang dangah te Manipur thalaite North-East mi kan nih vang ringawta an lo nghaisa chamchi te leh tualchhung tawng an thiam loh vanga an lo nghaisa te ang pawh kha kan condemn-na hi chiangkhuang takin ziaik ila a tha ang em aw tih te ka ngaihtuah a. Resolution hi kan dodal miah lova; amaherawhchu resolution neitu member zahawm tak pawh khan kha lampang zawnga thahnemngaihna kha min hriatthiampui se tih kha ka ngenna mai zawk a ni a. Tunah hian hmarchhak mite enhran kan nih thinna tih bona turin Dan tha tak siam turin hmalak ni rawh se tih a ni a. Hei hi Dan tha tak kan siam dawn pheh chuan Central Parliament ho hna tur te pawh a nih a rinawm a. Initiative siam ringawt ila Delhi-ah kan zuk impose thei dawn si lova. Kan Law Minister zahawm takin a sawi kha a dik a. Chuvangin, Delhi lamah pawh an bawhzui theihna turin tiang hian ngaihtuah ni se a tha khawpin ka ring.

Sports thleng pawh hian discrimination hi a nasa em em a ni. Tunah pawh kan hmeichhiate Indian Hockey team-a tel turin tunhma kum 5, kum 10 atang te pawh khan an that em

em rualin training camp-a lut turin discrimination avangin an lo thlah leh thin a. Nasa taka kan sawi avanga lut leh hram te an awm a. An han khelh tak takah chuan a tha ber ber te an ni leh lawi si a. Chutiang khawp chuan mi endawngna hi an nei a. He ramah hian official tam tak leh politician tam tak hian India hi at least three major races of the world, khawvela race ropui tak tak pathum chhimlamah Dravidians, Central India lamah Aryans ho leh North-East ah keini Mongoloid stock te hi min pawm lo te hi thil vanduaithlak a ni a. Chuvangin, heng hi a bo theihna turin Dan siam tir hi chu kan nawr tlan turah ka ngai a.

Entirnan, Remsanga thal kap mi tha tak kan nei a. Lumbaram-a kha a tluk thei reng reng lo a. Kan Secretary te, Director te kan hun hmasa lamah vawi hnih nge vawi thumna velah khan, 'engtizia nge hei hi, Mizo tlangvalin vai pawh a tluk thei lo, han bih chiang teh u,' ka ti a. An han bihchiang a, thal tha lo chi kha a ni kha chu an lo hman tir a, Lumbaram-a kha a tha ber chi an hman tir a ni. Tichuan, kan Sports Secretary leh Director hnenah, 'khawvela a manto ber chi leh a tha ber chi amah Remsanga duh ang ngei chi in leisak tur a ni,' ka ti a. Khami an han leisak hnu kha chuan Olympics ah pawh khan a tel nghal mai a ni. Chutiang khawp chuan a tha lova. Boxing-ah te pawh hian a ni, Mary Kom leh Jenny Mizo nulate pawh ka hnenah an lo kal thin a, training camp-ah an thlang lo lui tlat thin a. Mahsela Indian Olympic Association-ah te nihna pawimawh te ka lo chan ve avangin engtin tin emaw kan nawr lut chho ve zel a. Chutah chuan a kal chho zel a, tunah Mary Kom phei chu India ramin a chhuantawlawl neihchhun a ni ta ringawt mai a ni. Khatiang khan kal zel se chu wawiiinah hian hetiang a chhuan tur hi an nei dawn miah lo a ni, India ramah hian chutiang chu a ni a. Tin, hei hi society-ah kan tel avangin wawiiinah pawh kan sawiho a ni.

Politics lamah pawh hian kan tuar nasa hle thin a. Tunah hian harh tan an tum ta em aw tih a ngaihtuah theih chauh a ni. Kan sutlang chho zel a. Tunah chuan thu hnuhnung berah chuan, verbal-ah chuan Delhi University pali(4)-ah khuan North-East tawng engemaw zat tal zir ni se tih rawtna chu an siam ve tawh a. Tin, Delhi Police-ah pawh North-East mi a tam thei ang ber lak ni se tih rawtna ang deuh te chu a awm ve tawh a. Amaherawhchu, hman deuh khan Mizo tlangval tam thei ang ber recruitment tih dawnin khulaia an Police Commissioner te inbiak thiamna leh keimahni police officer te thahnemngaihna nawr luh ve kan tum a, an standard a lo sang deuh a, kan hlawhtling hleithe lova. Hengah te pawh hian Mizo tlangval a tam thei ang ber an luh theihna turin keimahni lamah pawh hian engemawtia lo train lawk dan te a awm ang em tih hi kan Police Officer te pawhin mahni thahnemngaihna kawng lo dap se chu a that ka ring a. Chutiang chuan Central lam pawh hi engemaw tak chuan insiam that ve chu an tum niawm

tak a ni. Tin, Central kawngkhar kik hawn nan pawh he lam hawi zawnga resolution awm hrim hrim hi a tha hrim hrim ka ti a.

Chuvangin, vawiin-a resolution hi Pu Speaker, a nih ang ang hian pass ta ila khu lamaah kan zuk chawh harh tum ber te hian a ngaihna an hre vak lo vang tih ka hlau deuh hlek a. Chuvangin, a resolution neitu berin siam that a phal phawt te chuan tun nge rawn hnial thei ang le, Dan siamtu kan ni a, kan siam chawp ang a, kan kalpui nghal mai dawn lawm ni, kan ram leh hnam tan leh India hmarchhak pumpui tan tiin mawl takin ka ngaihtuah ve a ni a. Hei hi pass a tul si a, pass loh a hlauhawm si a. Tin, hetiang kan han ti hrim hrim pawh hi India hmarchhak ho chuan Mizote leh MLA hote pawh hi an ngaihsan phah ka ring a, midang in an ti ve ngam ang em ka hre lo, chuvangin a ti hmasatu kan nih a tha a. Amaherawhchu, han bawhzui nuam deuh tur Central lamah pawh an lo pawm theih deuh tur chi kha a thain ka ring a. Dan thiam mi ka ni ve lova, amaherawhchu helai chhungah na na na chuan Dan chumi khamiah chuan, 40-naah chumi khami tih zawng zawng te kha chu kan la kawp vek a, a tha a ni mai lawm ni tih te kha ka'n ngaihtuah a. Engpawhnise, tha ka ti a, member zahawm tak Pu Lalruatkima'n a rawn pulut hi ka lawm a, kan pass ngei turah pawh ka ngai a ni.

Tin, kan Home Minister zahawm takin a rawn sawi kha chhungkaw vawng fel thlip thlep thei nih te hi tunlai chu a har khawp mai a, fa sual, zu in te, drugs ei te kan lo nei a. Heng hi inhmuhstnana hman hi Kristian-te tih dan tur a ni ang em? Mizote tih dan tur a ni ang em? Tin, tuna kan han lak vung ang te phei chu hnamdangten min hmuhsitna tur a ni a. He hmunah hian kan tlin em avanga awm kan ni lova, mipuiten Pathian khawngaihna min hlangkai a, tling leh tling lovin inthlahrung taka awm te kan ni a. Chuvangin kan tlin lohna te, kan fel lohna te inhmuhst ai chuan ringtu, rawngbawltute kan nihna angin intawngtaisak zawk te hi kan tih tur a ni dawn lawm ni. Eng nge hetiang hi chanchin ala awm a nih chuan i tawngtai sak teh ang kan chhung inkhawmah tih te pawh hi kan ngaihtuah dan zawk tur ni te pawhin a lang. Kan hruaitute hnamdangten min hmuhsit sak theih ang chi a kan sawi hi a tha lo a ni.

Vawiinah hian kan hotute zingah hian cheng vaibelchhe 1 nei kan awm ang em aw! Pu Mama te hi chu a nu leh pate atanga hausa deuh an ni a, an nei maithei a, midang hi chu cheng vaibelchhe 1 nei kan awm lo Pu Speaker. Mahse mi thenkhat chu helai hmunah kum 10 te an han awm a, thup theih loh chin pawh vaibelchhe 8 leh nuai

80 nei te pawh kan awm a lawm mawle. Khang kha kan sawi kan sawi hlei nem keini hian. Chuvangin kan thawhonaah hian inhaimualphona tur chi ang te a awm a nih chuan chu chu anmahni thu thu niselangin. Mahse hnam ang leh hruaitu kan nihna ang leh chhungkaw enkawl fel thlip thlep a har zia, zu in lo fa, drugs ei lo fa neih a har zia, mipa chu sawi loh hmeichhia nen lam a ni lawm ni kan buaipui tunlai hian? Chuvangin heng kawngah hi chuan politics a nih avanga engkim chhui anga inngaih mai hi a tha ka ti miah lo va. Chuvangin tun chinah chuan keini kan ni emaw tute an ni emaw, a party ang pawhin hetiang hnam pumpui intihmualpho tumna ang leh mimal inbeihna na lutuk, thudik ziktluak ni bawk silo, thudik ni se, thutak ni se thildang ala ni bawk si lovah hi chuan kan fimkhur a thain ka hria a. Tin, kan vei tak tak a nih chuan intawngtaisak hi Kristian-te tana hmanraw pawimawh ber leh hmanraw tha ber a ni.

Tin, he resolution hi ka sawi tawh ang khan tlawmah la lo ila, tha kan ti tlang theuh va, kan mithiamten hei hi chuan kori a tu ngei ngei ang, Central-ah pawh, khawiah pawh tih tur ang chi a kan duan chhuah hi a tha si a. Chuvangin resolution neitu pawh hi a tul chuan inhnuak hniam mai sela. A dodaltu, a pass duh lotu nih hi kan duh miah lo, pass kan duh, tha kan ti, lawmawm pawh kan ti. Chuvangin engtia tih tur ngei kei chuan heng kan Dante hi han chhiar thin mah ila ka hrethiam chuang lova, amaherawhchu, a thiam zawkten han ruahman sela Pu Speaker. Hetiang resolution rawn pulut hi tha ka ti khawp mai, keini ho pawh kan lawm, tin, kori a tukna tur apiangah kori tu turin kan zavai hian malsawm zui nghe nghe ila a thain ka hria. Ka lawm e.

**SPEAKER** : Pu Zodintluanga hian a seat a reserved hmasa ber. Nakinah ka ko mai ang che u, nakin deuhah aw. He lamah Pu Zodintluanga, Pu Romawia.

**Pu R. ROMAWIA, MINISTER** : Speaker hlui ka nihna atangin, khawngaih takin Dan chungchang a khawih tlat a. Speaker ka nih laia decision ka siamna ber chu Agenda a lo luh tawh hi chuan House ta a ni tih kha ka ngaihdaan a ni a. Resolution-a a lo luh tawh a House-in kan khel tawh hi chuan House Agenda-ah a lo tel tawh a ni. Chuvangin ka hunlai pawh khan kan member zahawm tak pakhatin 'Ui' chungchangah resolution rawn put luh a tum a ka phal tlat lo a ni. A vang chu Speaker-in resolution ka lo admit tawh kha chuan House Agenda-ah a lut tlat tawh mai a, House ta a ni tawh a. Mizoram state, Mizoram House-in Punjab House zuk sawisel tur emaw kha niin ka inhre lova, Punjab Speaker khan a member-te a reprimand mai tur a ni. Chuvang chuan House



pakhat kha House pakhat chung a lal zawk ang zia zanga lo sawi vak kha kan tih tura ka ngaih loh avangin kha resolution kha ka reject a ni.

Chuti chuan hei tunah chuan he kan resolution hi House property a lo ni ta a, House Agenda a lo ni ta a. Tichuan, House ah kan han sawiho ta tliar tliar a, negative zawnga sawi kan awm lo va, a effective dan tur ber kha kan duh theuh a ni a. Chuti a nih avang chuan kan Dan en khan Law Minister khan a interprete dan ang lo deuh hlek khan kei chuan ka interprete a. Kan Dan 129-naah hian ‘After a Resolution has been moved’ a ti tlat mai a. He hmunah hian member zahawm tak khan he resolution hi a rawn moved ta a ni. A moved tawh hnu kha tuna kan sawihona hi a ni ta a ni. ‘Any member may subject to all the rules relating to the Resolution moved and amendment to such Resolution’. Member-in, resolution neituin he House-a a rawn moved tawh hnu khan member tu pawh khan Amendment kha ‘such Resolution’ ah khan kan lo move thei ta a. Amaherawhchu, min tibwaitu tak erawh chu ‘a copy of which shall be given to the member moving the Resolution’. Resolution neitu member hnenah khan a Amendment copy kha a pe tur a ni tih a ni. Hetia sawi mai mai a ni lo a, sawi a ka duh tih mai mai a ni lo a, written khan a pe tur a ni, tih ni maiin a lang a. Chuvang chuan hemi 130-na zawk kha ni khat Secretary-in a lo kawl ren rawn tawh tur a ni tih nen hian Rules 129-na leh 130-nain a sawi tum hi a inang lo in ka hria a.

**SPEAKER** : Rules 130-na a tawp ber kha chhiar nghal rawh le, Tah khan a chiang thei ang. A tawp ber kha.

**Pu R. ROMAWIA, MINISTER** : Rules 130-naah chuan Secretary hnenah miin tahrik ni 10 ah emaw khan an lo ballot tawh a. An lo ballot tawh khan kan member zing ami tu emaw khan a copy min lo pek tawhah khan ni 14 a sawiho tur a ni a. Ni 12 emaw ni 13 emawah khan, nikhat tla khan Amendment kha Assembly Secretary hnenah a lo thehlut tawh tur a ni a. Assembly Secretary hnena a lo thehluh tawh kha Speaker a lo hriattir tawh tur a ni. Chu chu 130-na hi chuan heti laia a procedure kalmuang zawk a sawi mai niin ka hria a. 129-na hi chuan tuna House-in Agenda a kan lo neih tawh hnuah hian niin 130-naah chuan. House-in agenda kan la neih hma, Speaker in a admit tawh hnu si mahse, a la move hma si khan a ni a. Chuvangin, 130-na hi chuan, a hma a thil lo awmah resolution a hmuh veleh khan, hei hi chu siam that loh chuan kei chuan ka pass pui dawn lo. A siamthatna ka han ti ve teh ang, committee-a a va tihna ang kha, 130-naah kha chuan a ni a. Mahse, chutah chuan

amendment kha tu in emaw a rawn object thei tho ta a. Tu in emaw amendment a va dil ta a, mahse tu in emaw amendment loh hi tiin tu in emaw a va object ta a, chutah chuan Speaker in ruling a nei ta a ni, ‘amendment angin kan kal ang’ tih ang emaw kha 130-na hian a sawi tum niin ka hria a.

**SPEAKER** : “Unless the Speaker, in his discretion allows the amendment to be moved” a ti ta tawp a ni. Chuvangin, amendment kha a move leh thei ta a ni, a duh chuan.

**Pu R. ROMAWIA, MINISTER** : Chuvangin, subject tam tak kha chu khati lai chungchangah kha chuan sawi ka tum chuang lova. Keini te pawh mipui zarah foreign ah te kan zin a, India mi kan nih min ringlo tak tak te an lo tam a, chutiang te chu kan tawk nak nak zel a ni. Engpawhnise, kha kha chu khuti lamin leh foreign ami pawhin min rin loh te pawh kha thil awm thei a ni a. Khati lam kha chu tunah sah mekin a awm a.

Ka han rawt duh chu, tunah hian min chawlh tir rih la, tichuan keini ding leh veilam a mite kan thukhawm ang a, he resolution neitu nen te kan han sawi khawm laih laih ang a, kan duh ang takin ziaak ngeiin i hnenah a copy a rawn pe leh ang a, kan resolution neitu khan. Chutiang ang zawnga her rem kha i hnenah a rawn dil leh ang a. Chutiang chuan House-in lungual takin kan conclude thei dawn a ni. Ka duh dan tak phei chuan kan House Leader khan thahnem a ngai em mai a, kan pass hunah khan kan House Leader chhhuah a tul a, loh theih loh avangin, member dang zawng zawng chu awm thap ang u, tih kha ka duh dan a ni.

**SPEAKER** : A neitu kha sawm tawh i la, a remti em?

**Pu LALRUATKIMA** : Pu Speaker, ka lawm e. A bengvarthlak khawp mai a. Session hi ka vawi-4 tel vena a ni a, ni 10 chuang awrh chauh he House-ah hian kan thu ve a. Chuvang chuan kha dan kha kan han en a, engtin nge ni ang, kan ti a. Kan House Leader khan anti-racial law te hi siam a rawt avangin, kha mi hmer kawp chung khan kan rawn dah a ni. A tira ka thehluh tumah chuan anti-racial law siam ni rawh se tih ang deuh khan ka dah a ni Pu Speaker. Mahse Mizo tawng hi a mawi zawk ange kan tih avang mai chauh a ni a, a siam theitu leh a siamtu kha kan ni hauh lova, chuvangin kan Speaker kal chhuak tain a rawt ang khan siam danglam emaw, tha kan tih tlan a kha, keimahah chuan tha ka ti vek mai a. Chuvang chuan member-ten kan sawiho a, i remtih nain siam that a rawn move that leh a tul a nih pawhin rawn move that leh kha a that ka

ring a ni. Kan inlungruanaah member zawng zawngte chungah lawmthu ka sawi a, chuvang chuan move that leh tura rawtna awm pawh kha tha ka tihpui thlap e.

**SPEAKER** : Awle, hei a la hun chiah lo nain inbuatsaihna kan ngah deuh dawnah ngai mai ila. Kan dan 130-na a tawp ber khan Speaker-ah thuneihna a lo pe hlauh mai a, a tihzia khawp mai a, chuvang chuan tunah kan chhuak rih ang a, ding leh vei lam kha a laiah in in tawng ang a, tha takin rem in lo siam ang a, nakin dar 2:00 ah kan lut leh ang a, tah chuan kan sawihona kan tan leh dawn nia. Engnge Pu Zoramsangliana

**Pu P.C. ZORAM SANGLIANA** : Khata tang khan a buaipui tur a kha han rawt mai la pahnih pathum emaw kha.

**SPEAKER** : Chair atanga han rawt ngawt kha chu nia, han rawt teh u.

**Pu R. ROMAWIA, MINISTER** : Pu Speaker, Deputy Speaker room-ah kan Legislature Party ve ve ten a ti tura an ruat kha kal mai tur i ti ang aw.

**SPEAKER** : Awle, nangmahnin lo in detail mai ula, Deputy Speaker kaihhruaina hnuaiyah in lo buatsaih dawn nia. Tunah kan chawl rih mai ang a, minute 5 la awm mahse dar 2:00 ah kan thu leh dawn nia.

### **2:00 P.M.**

**SPEAKER** : Kan sawi ngai kan hmabak kha chhonzawm leh kan tum ang a. Chawhnuah amendment siam ni se tih kha House ngaihdan a ni a. Chuvangin resolution neitu khan amended form a move leh kha a ngai a kan dan 130-in a phal angin. A nih leh resolution neitu sawm ila.

**Pu LALRUATKIMA** : Pu Speaker, i remtihna leh he House zahawm tak phalna angin hetiang hian ka resolution tihdanglam ka rawn dil e, “India ram hmun hrang hrangah hmarchhak mite enhran kan ni thin leh chi inthliarna vanga kut tuar leh nunna chan hial te kan awm ta fo mai hi he House hian paw a tiin kut tuarte a tuarpui takzet a. Hetianga hmarchhak mite enhranna leh kut thlakna hi tun hnuah thleng tawh ngai lo se kan ti” tih a ni e, ka lawm e.

**SPEAKER** : Tuna amended form ang khan i rawn move leh ang a, Kha kha move phalna i dil tawh a, ka phal che a, Dan 130-in a remtih angin move phalna i nei tawh a, tikhan rawn move leh la a tha ang e. Dan hi a awm a.

**Pu LALRUATKIMA** : Pu Speaker, ka lawm e, i phalna leh he House remtih nain ka resolution tuna ka rawn chhiar chhuah kha ka rawn move a, kan member-te sawiho theih turin he House zahawm takah hian ka rawn move e.

**SPEAKER** : Amended form kha hetiang hi a ni a. “India ram hmun hrang hrangah hmarchhak mite enhran kan ni thin leh chi inthliarna vanga kut tuar leh nunna chan hial te kan awm ta fo mai hi he House hian a paw i a tiin kut tuarte a tuarpui takzet a. Hetianga hmarchhak mite enhranna leh kut thlakna hi tun hnuah thleng tawh ngailo se kan ti” tih a ni a, kan pawm tawh a, sawihona kan hawng leh mai ang chu. Sawi duh nei chuan hemi form ang hian kan sawi thei tawh e. Pu Rinawma.

**Pu R. LALRINAWMA (DEPUTY SPEAKER)** : Pu Speaker, kha resolution neitu leh Ruling lam te nangman chair atanga i direction ang khan hetah Ruling te nena ti hovin, tiang khan tihdanglam a rawn dil a, chuvang chuan sawiho vak pawh a ngai tawhin ka hrelo a, kan duh tlan theuh ang a ni tawh a, ‘Dan tha tak siam ni rawh se’ tih kha kan paih a ni mai a. Kan han ngaituahn hemi chungchangah hian Dan tha tak tak kan lo nei tawh a. Parliament siam The Scheduled Caste and The Scheduled Tribe (prevention of atrocity) Act 1989 te pawh kan nei a. Tin Constitution-ah fundamental rights ah meuh hetiang a race avang te, Caste avang te a inen hran lohna tur Article 15 ah a awm a, chung chuan a veng zo tawh lo a ni a, dan eng ang pawhin siam mah ila a veng dawn lo va. Chuvang chuan hetiang kan duh lohna, paw i kan tihna te leh thleng tawh lo se kan tih thu House-in kan auchhuahpui hi kan tih theih chu a ni mai a, chuvangin sawi zui vak ngai pawhin ka hre tawh lo va, adopt mai kha a tha mai lawm ni tih kha ka rawn sawi duh a ni e, ka lawm e.

**SPEAKER** : Hei hi Home chan a ni a, Home Minister-in sawi duh a neih chuan sawm ila.

**Pu R. LALZIRLIANA, MINISTER** : Pu Speaker ka lawm e. Vawii nah resolution Mizote thinlung vit tak leh India rama enhran kan nih thinna te kan duhlo zia resolution a lo lut a, helaiah kan han sawihova, hetiang lo deuh hian amend ni sela tih te kan han sawi tlang a, chutianga kan sawihona te inlungual taka party pahnih ten kan han siamtha thei hi a lawmawm ka

ti a. Tin, he House-ah hian keini kan awm chung hi chuan Opposition te kan enhran loh zia vawiinah pawh a lo lang lehin ka hria. Party ang leh inenhranna deuh te keimahniah awm sela chuan, hei hi chu a tha tawk lo ve tiin ban tam lamin kan phar thla maithei bawk a. Amaherawhchu, kan hnam tana thil tha kan tanrualna lantir leh hetiang India rama kan awm chung a enhran kan lo nih fo thin kan thinur zia Mizo mipuite aiawha sawi chhuak theia kan awm hi a lawmawm ka ti a. Chuvangin vawiina amendment a resolution neituin a rawn move leh tak ang khan sawiho pawh ngai tawh lovin kan pass thei tawh mai lawm ni, ka lawm e.

**SPEAKER** : A nih leh kan resolution neituin pass rawn dil tawh mai rawh se.

**Pu LALRUATKIMA** : Pu Speaker, ka lawm e. Kha kan resolution kha tun seventh session ah hian kan private resolution hmasa ber a nih thu te he House zahawm takah hian kan sawi chhuak tawh a. A hmasa berin lungrualna nen hetiang a kan han kal thei tur awma han lang ta hi lawmawm ka ti takzet a. Sawitu hrang hrang ten India ram chung a hmun hrang hrangah hmarchhak miten harsatna kan tawh thin te experience ropui tak kan lo neih tawh te kan han sawi lang te kha a lawmawm takzetin ka hria a. Chutih lai chuan nunna chante leh kut hial tuarte tawrhpuina kan han lantir te kha a ropui takzetin ka hre bawk a ni.

Pu Speaker, India ram hi kan hria a, a mi cheng te pawh hnam tin chi tin awm khawmna kan ni a. Hmarchhak miten kan harsatna tawh hi India mi zawng zawng laka tawk kan ni lova, mi tlemte kan ni ang. Amaherawhchu, hengte inzirtira kut tuar leh nunna tuarte han tawrhpuie ve hi he House tihah pawh hian thil mawi tak a nih thu te pawh kan ngaithla a.

Ka private resolution hi Pu Speaker, mi 9 in kan sawi a, a lawmawm hlein ka hria a, member zahawm takte khan a tul thu leh hetiang kan tawrhna zawng zawng pawh an tih dan te kan ngaithla a, a duh lo zawng sawi kha tumah kan awm lova, a lawmawm takzetin ka hria a. He House hian he resolution hi kan han pass hian a bawh zuitu tur chu keimahni vek kan ni a. Chutih lai chuan a mi chengte pawh hian zir tur tam tak kan nei a. India rama kan zin kan vahnaah te, eizawng kan kal chhuahnaah te pawh hian zir ngai tam tak kan neih ka ring. A chhan chu hnam tih dan te, khawsak phung te a lo inang lova. Kan va kalna te khawsak zia te, nun phung te kha engemaw chenah tawmpui te a ngai thin a. Helaia zalen taka kan awm anga a remchan hun leh hunlo te pawh a awm thei a ni tih erawh chu kan inzirtira kan hriat tlan zel hi a tul takmeuh meuhin ka hria a ni. Chuvang chuan, kan House-in hetiang kan sawihova, lungrual taka kan han kal tlang

thei hi kan ruling lam ti mai teh ang, treasury bench lamah pawh lawmthu ka han sawi duh a. Kan House Leader zahawm takin hun rei tak atanga a lo vei tawh thu te.

Tin, he discrimination hi kum tam tak atanga kan lo tawn tawh thin a nih thu kan han ngaithla te pawh kha a ropui khawp mai a. Chuvang chuan kan inzirtir a, hemi kawnga kan than harh a, zir tur tam tak kan nei a ni tih hre chung leh kut thlak tawrhna te, nunna chan kan awm tawh lohna tur atana hetiangka kan House in resolution kan nei hi a lawmawm takzet zetin ka hria a. A bik takin kan ruling lam te Pu Speaker, i dinglam ami te (ti kher teh ang, tawngkam mawi lo ni lo se) chungah lawmthu ka sawi duh a. Tichuan he House zahawm takah hian kan member zahawm tak takten an sawi kha thual nawn leh tulah pawh ka ngai hran tawh lova an sawi fiah a.

**Pu R. LALZIRLIANA, MINISTER** : Pu Speaker, khawngaihtakin ka lo tibuai lawk che. Nichinah khan, tawrhna experience ropui tak mai kan nei tih lai tak mai kha chu a ropui lo va, a rapthlak zawk a, tawng sualah ngai ila, khati zawng khan correct ila, a tha awm mang e tih ka ngaihtuahnaah a lo awm deuh a ni.

**Pu LALRUATKIMA** : Slip of tongue a ni a nge, tawng sual hi a awl a, min hriatthiamna ka rawn dil e, ka lawm khawp mai. Pu Speaker, he kan House zahawm takah hian India ram hmun hrang hrangah hmarchhak mite enhran kan ni thin leh chi inthliarna avanga kut tuar leh nunna chan hial te kan awm ta fo mai hi he House hian pawl a tiin kut tuar te a tuarpui takzet a. Hetiangka hmarchhak mite enhranna leh kut thlakna hi tun hnuah thleng tawh ngai lo se, tih resolution chu he House zahawm takin a pawmpui tur leh kan member-ten rem min tihpuia min adopt sak turin ka rawn dil e, ka lawm e.

**SPEAKER** : Awle, ka chhiarchhuak tawh lo mai ang a, vawi hnih vawi thum chhiarchhuah tawh a ni a. Pass remti zawngin “remti” ti ula (Member : Remti) Remti lo kan awm em ? Kan awm lo.

**Pu LALRUATKIMA** : Pu Speaker, ka lawm e.

**SPEAKER** : Tunah hian resolution ka chhiarchhuak leh ang a – “India ram hmun hrang hrangah hmarchhak mite enhran kan ni thin leh chi inthliarna avanga kut tuar leh nunna chante kan awm ta fo mai hi he House hian pawl a tiin kut tuar te a tuarpui takzet a. Hetiangka

hmarchhak mite en hranna leh kut thlakna hi tun hnuah thleng tawh ngai lo se kan ti” tih chu he House hian lungrual takin a pass a ni.

Member zahawm takte hriat atan. Zing atanga tlai thlenga he House a awm lo tur, nilenga absent tur te tih loh chu written a phalna dil kher a ngai lo va. Reilote va chhuah lawk te hi chu thil awm thei a ni a. Nakinah chuan nilenga absent mai tur te ni kher lo kha chuan ziaka phalna dil kher a ngai lo tih kha he House hian hria ila a tha awm e. Tunah chuan kan chawl rih ang a, Thawhtanni tahrik ni 17, zing dar 10:30-ah kan kal khawm leh dawn nia.

Sitting is adjourned.